

١٩٦٦/١٢/٤

## كلمة الرئيس جمال عبد الناصر

في مأدبة عشاء تكريماً للرئيس هواري بومدين

■ الأخ العزيز الرئيس هواري بومدين..

أيها الإخوة والأصدقاء:

حين أستمع والملايين معي من أبناء شعبنا إلى تحيتكم له، وإلى مشاعركم التي تكشفون عنها في صدق الأخ وإخلاصه، لا يملك الواحد منا - وقلبه ينبض بالوفاء والتقدير - إلا أن يستوعب في خاطره - في ومضة واحدة - كل هذا التاريخ الطويل الذي ربطت أحداثه بين شعب الجمهورية العربية المتحدة وشعب الجزائر، وأكملت برباط النضال ملامح الأخوة الأصيلة بينهما، فكأن الدماء التي تجرى في عروق الملايين الذين التقيت بهم من بورسعيد إلى أسوان، هي نفس الدماء التي تجرى في عروق إخوتهم في الجزائر؛ من قمم الجبال في الأوراس إلى بطون الوديان في وهران.

ولقد مرت سريعة تلك الأيام التي قضيتها بيننا، والتي استغرقت أغلبها في زيارتك، التي حاولت فيها أن تلتقي بأبناء هذا الشعب، وهم في مواقع العمل من أجل معركة البناء التي تشد اهتمامهم وآمالهم، والتي يتعلق عليها أملهم في تحقيق التطور الاشتراكي الكبير. ولئن كنا قد استطعنا أن نخصص جانباً من وقتك للأحاديث الطويلة التي دارت بيننا، إلا أنني أشعر أن لقاءك بأبناء هذا الشعب كانت متممة لتلك الأحاديث؛ لأنه هناك وعلى الطبيعة وفي مواقع العمل

يحدد الشعب ببساطة ملامح الطريق الذي نخطو فيه، ولست أشك لحظة واحدة أن الطريق الذي اختاره شعب الجمهورية العربية المتحدة؛ ليسير فيه، هو نفس الطريق الذي اختاره شعب الجزائر ليكون فيه مساره.

إنه طريق الحرية؛ نمضى فيه جنباً إلى جنب، ونحث الخطى فى عزم وإصرار، وإن كنا نعلم أن هذا الطريق طريق طويل؛ ذلك لأن الحرية إنما تمثل بجانب الحرية السياسية الحرية الاجتماعية. ولقد كانت كل أمانى شعبنا قبل الثورة أن نتخلص من الاستعمار البريطانى، وأن نقضى على الملكية المتعاونة مع الاستعمار، وقامت الثورة يوم ٢٣ يوليو سنة ٥٢، وانتهى عهد الاحتلال البريطانى، وانتهت الملكية وأعلنت الجمهورية، واسترد الشعب المصرى قناة السويس من استغلال الرأسمالية العالمية، واستطاع أن يهزم العدوان الثلاثى سنة ١٩٥٦. ولم يكن هذا كله إلا بداية الطريق.. طريق الحرية.. الحرية الاجتماعية، وتسابقت الخطى وتتابعت، كل خطوة نخطوها لا تترك لنا الفرصة ريثما نلتقط أنفاسنا، وإنما تفرض علينا خطى جديدة؛ ذلك أن مفاهيم الحرية قد اتسعت أبعادها أمام مدارك هذا الشعب، لم تعد الحرية مجرد صراع ضد الاحتلال داخل الوطن الصغير، وإنما الحرية هى صراع ضد الاستعمار فى العالم الكبير، لا يستطيع شعب أن يعيش آمناً مطمئناً وهناك قوى ضارية تخطط كل يوم؛ من أجل توسيع مناطق نفوذها، ولم تعد الحرية مجرد حرية الشعب ككل وإنما أصبحت أيضاً حرية للفرد نفسه داخل نطاق هذا الشعب، تحرره من كل ما يشده إلى الوراء، تحرره من الاستغلال، من الإقطاع ومن سيطرة رأس المال، وأصبحت الحرية هى الاشتراكية، الكفاية والعدل.

### الأخ العزيز:

إن الاستعمار لم يعد يتحرك فى صورته القديمة البالية؛ وإنما أصبحت له أساليب جديدة يتخفى وراءها، هو يتخفى وراء الرجعية التى تجد فى بقاءه استمراراً لحياتها.. وهو يتخفى وراء الصهيونية التى وثبت إلى حكم فلسطين لتهدد الوطن العربى.. وهو يتخفى وراء التفرقة العنصرية التى وثبت إلى حكم

روديسيا وجنوب إفريقيا تهدد العالم الإفريقي المتحرر.. وهو يتخفى وراء الضغوط الاقتصادية، وراء السيطرة على الأسواق العالمية، وراء التقدم العلمي الواسع؛ الذي يخلق البون الشاسع بينه وبين سائر الشعوب، فيضعها دائماً في مكان المحتاج إليه، وإذا بالصراع ضد هذا كله يخلق مفاهيم جديدة استوعبتها شعوبنا التي تبصر الطريق، وتحمل ما يخصها من عبء المسار فيه.

لقد قلت لك - أيها الأخ - من قبل إن زيارتك قد جاءت في الوقت الأمثل، ولهذا أقول إن محادثتنا قد حققت الغاية المثلى؛ ذلك أن هذه المحادثات لم يستغرقها تفهم الواقع من أمورنا، فالواقع واحد ومعروف، ولم يستغرقها توحيد مناهمينا وأفكارنا وأهدافنا، فأفكارنا دائماً واحدة، ومفاهيمنا واحدة من أجل الهدف الواحد، ولكن بحث احتمالات المستقبل كان أهم ما دار بيننا، وليس من شك أن هناك تربصات جديدة على طريق نمونا.. إن تحالف الاستعمار والرجعية لن يقبل بالسكوت وهو يرى بناء الاشتراكية يرتفع فوق أرض الجمهورية العربية المتحدة وفوق أرض الجزائر، وعلى مناطق أخرى من العالم العربي، ونحن أيضاً لم نقبل بالسكوت على تحركات حلف الاستعمار والرجعية.

#### أيها الأخ والصديق العزيز:

إنكم إذ ترجعون غداً إلى الشعب الشقيق في الجزائر، فإني أحملكم إليه كل ما تملكه النفس من مشاعر الود والإخاء والمحبة؛ مني ومن الشعب المصري، هذا الشعب الذي يرى فيكم أخواً مجاهداً، وبطلاً ورسولاً لشعب ضرب المثل واندوة في الكفاح، في الشجاعة، في الاستبسال، في التضحية؛ حتى أصبح القياس الذي بلغه بعيداً عن منال كثير من الشعوب غيره، مع كل ما وفرت له الظروف من إمكانيات.

ولنقف جميعاً تحيةً إلى الصديق والأخ العزيز الرئيس هواري بومدين.. تحية إلى الوفد الممتاز المصاحب له، ولنقف جميعاً تحيةً للعلاقة الخاصة ما بين الثورة المصرية والثورة الجزائرية، بما استطاعت أن تؤديه من دور حاسم وفعال في تاريخ الإنسانية.

١٩٦٦/١٢/١٠

## ردود الرئيس جمال عبد الناصر

فى حفل تقديم أوراق اعتماد سفراء  
اليمن، نيبال، إيطاليا، العراق، هولندا

### ردّ الرئيس جمال عبد الناصر على كلمة سفير اليمن

■ يسرنى أن أستقبلكم ممثلاً للجمهورية اليمنية الشائرة.

وإنى أنتهز هذه الفرصة لأؤكد أن الجمهورية العربية المتحدة ستساند الجمهورية العربية اليمنية؛ حتى تستطيع أن ترسخ أقدامها وتثبت نفسها، وحتى تستطيع أن تنتصر على مؤامرات الرجعية والاستعمار، وإنى على ثقة من أن شعب الجمهورية العربية المتحدة يهدف إلى أن يرى الجمهورية العربية اليمنية، وهى تقوم بدورها الطبيعى، ودورها فى التطوير، ورفع مستوى المعيشة للشعب اليمنى.

وأنتهز هذه الفرصة لأبعث بأطيب الأمنى للمشير عبد الله السلال، مع تمنياتى للشعب اليمنى الشقيق.

### ردّ الرئيس جمال عبد الناصر على كلمة سفير نيبال

يسعدنى أن أقبل أوراق اعتمادكم سفيراً لنيبال، لدى الجمهورية العربية المتحدة.

إن العلاقات بين بلدينا علاقات ودية، وسوف نبذل قصارى جهدنا في سبيل تنمية هذه العلاقات في جميع الميادين.  
وأنتهز هذه الفرصة لأبعث بأطيب الأمنى إلى جلالة ملك نيبال، مع أخلص تمنياتى لشعب نيبال الصديق.

### ردّ الرئيس جمال عبد الناصر على كلمة سفير إيطاليا

يسعدنى أن أقبّل أوراق اعتمادكم سفيراً لإيطاليا، لدى الجمهورية العربية المتحدة.

وإنى أتفق معكم فى أن العلاقات بين بلدينا علاقات ممتازة، وأن رغبتنا الأكيدة هى تنمية وتدعيم هذه العلاقات فى جميع الميادين.. هذا وأود أن أشير إلى أننا فى غاية السعادة للتعاون بين بلدينا، وللتعاون المخلص من قبلكم لتطوير بلادنا.

وإنى أنتهز هذه الفرصة لأعبر عن أخلص تمنياتى وتحياتى للرئيس "جوزيبى سارجات" ولحكومته، ولوزير الخارجية "أمنتورى فانفانى"، مع أخلص أمانى شعب الجمهورية العربية المتحدة للشعب الإيطالى الصديق.

### ردّ الرئيس جمال عبد الناصر على كلمة سفير العراق

يسعدنى أن أقبّل أوراق اعتمادكم، كممثل للجمهورية العراقية الشقيقة، وكممثل للأخ الرئيس عبد الرحمن عارف.

إن العلاقات القوية بين ثورة بغداد وثورة ٢٣ يوليو عام ١٩٥٢ مبنية على أساس خير الإنسان العربى؛ ومن أجل خير الأمة العربية، وإن الثورتين المتلاحمتين تعملان من أجل الحرية والاشتراكية والوحدة، وهذا يحتاج إلى الجهود الكبيرة والعمل المتواصل.

إننى أشارككم الرأى فى أن تلاحم الثورتين، والجهد المشترك ضرورى للوقوف فى وجه الاستعمار والرجعية والصهيونية.

وإنى أنتهز هذه الفرصة لأبعث بأخلص تحياتى للأخ الرئيس عبد الرحمن عارف، راجياً له كل خير، مع أخلص أمنى الخير والازدهار للشعب العراقى الشقيق.

### ردّ الرئيس جمال عبد الناصر على كلمة سفير هولندا

يسعدنى أن أتقبل أوراق اعتمادكم سفيراً لهولندا، لدى الجمهورية العربية المتحدة.

وإننى أشاطركم الرأى فى أن العلاقات القائمة بين بلدنا علاقات قوية متينة، وسوف نبذل قصارى جهدنا فى التعاون معكم ومع حكومتكم؛ من أجل تنمية هذه العلاقات فى جميع الميادين.

وأنتهز هذه الفرصة لأبعث بأخلص التحية والأمانى إلى جلالة ملكة هولندا وإلى حكومتها، راجياً للشعب الهولندى الصديق دوام السعادة والازدهار.

١٩٦٦/١٢/٢٣

## خطاب الرئيس جمال عبد الناصر من بورسعيد بمناسبة عيد النصر

### ■ أيها الإخوة المواطنين:

فى العيد العاشر ليوم النصر، وفى هذه المدينة الباسلة تمر مواكب الذكرىات الباقية والخالدة، تملأ مشاعرنا بالفخر بقدر ما تملأها بالعزم، وتثير فينا الاعتزاز بسنوات نضالنا الماضية بقدر ما تؤكد ثقتنا بالنفس فى سنوات النضال المقبلة، وتتثبت لنا ولأصدقائنا ولأعدائنا على السواء، وللعالم كله طاقتنا على التحمل والصمود واستعدادنا لخوض المعارك، ومقدرتنا على تحقيق النصر؛ واقفين تحت راية المبادئ العظيمة، التى ألهمت وتلهم كفاحنا فى مسيرته التاريخية الطويلة إلى أهدافنا الكبرى.

إن مواكب الذكرىات الباقية والخالدة تكاد ترى رأى العين فى هذه المدينة لباسلة، بعد ١٠ سنوات من يوم كفاحها المجيد الشعب، المتأهب لضربة العدوان الثلاثى لا يعرف متى تنزل وأين تنزل.. هذه المدينة الخالدة الباسلة تعرف أنها الهدف الأول وأنها نقطة الانقراض. فى سنة ٥٦ - فى نوفمبر - أمواج الطائرات بالمئات تلقى على بورسعيد مئات الأطنان من القنابل، مدافع الأساطيل تحاول دكها لإخماد أية مقاومة قبل نزول قوات الغزو إلى الشواطئ، الرجال ابواسل من القوات المسلحة ومن الجماهير جنباً إلى جنب يقاتلون، النساء والأطفال أيضاً فى ساحة المعركة.. العدو ينزل بقواته إلى الأرض الطاهرة، لكن

المقاومة لا تهدأ، بل هي تشتد بشهادة قواد جيش العدو المهزوم، الذين قال أحدهم في مذكراته أخيراً: إنه شعر في بورسعيد أنه ليس في ميدان نار فحسب وإنما في جهنم من الكراهية، فالعدوان يرغم على التوقف بفعل الصلابة الوطنية المصرية والقومية العربية بالدرجة الأولى، ثم العدوان يبدأ في التراجع بعد التوقف.

ثم يجيء هذا اليوم - الذي نحتفل الآن بـ ١٠ سنوات على ذكره - فإذا العدو يرغم على الرحيل متعرضاً لهزيمة عسكرية وسياسية، ليس لها مثل في التاريخ المعاصر، بل إنه بعدها اختلف التاريخ ليس على أرضنا فحسب، اختلفت موازين القوى في العالم كله سقطت إمبراطوريات وتفتت كتل، وصعد نجم حركة التحرير الوطني بازغاً في سماء القارات الثلاثة المطالبة بالحرية آسيا وإفريقيا وأمريكا اللاتينية.

لقد اختلفت النتيجة التي انتهت مؤامرات العدوان الثلاثي إليها عن الأهداف التي قصد إليها مدبروها، ولم يعد الآن سراً يخفى فإن هذه السنة كانت مليئة بالأضواء الجديدة على معركة السويس الخطيرة، لم يعد هناك الآن شك - أيها الإخوة - في المؤامرة الثلاثية.

بمناسبة مرور ١٠ سنوات على حرب السويس، نشرت في الشهور الماضية كتب ومقالات وأبحاث كثيرة واتضح التآمر، ٣ دول اجتمعوا وكأنهم ٣ عصابات، اجتماعات سرية وأستار مسدلة وعهود بالكتمان. بعد تأمين القنال كانت هناك خطط إنجليزية للعدوان وكانت هناك خطط فرنسية للعدوان، وكانت بريطانيا وكانت فرنسا في حاجة إلى وقت علشان يعملوا الخطط وعلشان يحشدوا قواتهم. وسارت الأمور بعد يوليو، واتخذت خطوات، وكلنا نعرفها؛ لأننا سمعنا عليها في هذا الوقت كانت تهدف لتدويل قنال السويس.. قنال السويس اللي كنا بناخذ منها في هذا الوقت مليون جنيه، وكان باقى إيرادها تاخده الشركات الاحتكارية الأجنبية، قناة السويس اللي حفرها أبناؤنا واللى ماتوا فيها أبناء مصر كانت دولة في داخل الدولة، يوم ٢٦ يوليو أممت قنال السويس

وعادت القتال إلى أهلها.. وإلى الشعب المصري.. إلى الشعب العربي، وأخذ  
 انحقد يتأجج في النفوس.. في نفوس أعدائنا، وقرروا العدوان، ولكن لم يكن من  
 أسهل عليهم إنهم يعتدوا بدون ذريعة.. بدون حجة، ففكروا في إسرائيل، أن  
 تكون إسرائيل الذريعة وأن تكون إسرائيل الحجة، وحصلت اتصالات بين فرنسا  
 وإسرائيل وأمدت فرنسا إسرائيل بكل ما طلبته من الأسلحة.

دى الأسرار اللى هى إتقالت السنة دى بمناسبة مرور ١٠ سنوات على  
 حرب السويس وعلى العدوان على بورسعيد، وعرفت بريطانيا باتفاقات فرنسا  
 مع إسرائيل ووافقت على أساس ألا تتورط هى فى التعامل مع إسرائيل، ولكن  
 'بن جوربون' - رئيس وزراء إسرائيل فى هذا الوقت - صمم إنه ما يدخلش  
 الحرب إلا إذا عقد اجتماع مع ممثلين لفرنسا وممثلين لبريطانيا. وفى يوم ١٦  
 أكتوبر سنة ٥٦ طلع 'بن جوربون' سراً فى طائرة من إسرائيل ووصل إلى  
 مطار عسكري فى فرنسا، ولم يعلن عن زيارة 'بن جوربون' إلى فرنسا، كانت  
 العملية عملية سرية، وركب عربية من المطار فيها ستاير مستخبي وراح إلى  
 فيلا، وفى هذه الفيلا قابل رئيس وزراء فرنسا اللى جه وهو سابق عربيته بنفسه  
 وجه متخفى إلى هذا المكان فى بلدة تسمى 'سيفر' وجا 'سلوين لويد' وزير  
 خارجية بريطانيا، وقعدوا عملوا اجتماع، واتفقوا فى هذا الاجتماع على أن تقوم  
 إسرائيل بالهجوم على مصر، وحددوا يوم الهجوم، وعلى أن تلقى إسرائيل كتيبة  
 مظلات قرب قنال السويس، وعلى أن تقوم بريطانيا وفرنسا بإعطاء إنذار  
 لمصر وإسرائيل بإخلاء منطقة قنال السويس والسماح باحتلال بورسعيد  
 والإسماعيلية والسويس بقوات بريطانية فرنسية. طبعاً بتقبل إسرائيل هذا الإنذار  
 إنها تبعد ١٠ أميال من قنال السويس، ومصر إما تقبل الإنذار وبهذا تحتل  
 بريطانيا وفرنسا مصر، وإما ترفض الإنذار وبهذا تتحرك قوات العدوان ويبدأ  
 العمل على احتلال مصر.

"بن جوربون" فرض شروطه علشان يشترك فى هذه المعركة - الكلام دا  
 حسب الأسرار اللى أعلنت فى هذا العام - أول شرط قال إنه فى حاجة إلى

طيران علشان يحمى له المدن الإسرائيلية من قاذفات القنابل المصرية، وإنه فى حاجة إلى أسطول علشان يحمى له السواحل الإسرائيلية من الأسطول المصرى، ثم طلب من بريطانيا وفرنسا أن يسرعوا فى مهاجمة المطارات المصرية حتى يضيع الخطر عن إسرائيل من تهديد الطيران المصرى، وعُدوه بهذا ولكن "بن جوربون" لم يقبل الوعد الشفهى، وطلب منهم أن يكتب هذا الكلام.

تعهدت فرنسا إنها تبعت لإسرائيل عدة أسراب من طائرات "الميستير"؛ حتى تحمى إسرائيل ضد أى هجوم بالطائرات المصرية، وتعهدت فرنسا أن ترسل أسطولها أو جزء من أسطولها لعمل دوريات فى المياه الإقليمية الإسرائيلية وخارج المياه الإقليمية؛ حتى تقابل أى قوات بحرية مصرية.

وبعد هذا الكلام، وبعد هذا الاتفاق، وبعد تحديد التواريخ، وقفوا الثلاثة: "جى موليه"، و"بن جوربون" - "جى موليه" رئيس وزراء فرنسا، "بن جوربون" رئيس وزراء إسرائيل - و"سلوين لويد" وزير خارجية بريطانيا - وأقسموا أنهم لن يبوحوا بالسر ماداموا على قيد الحياة. الاجتماع دا ماكانش فيه غير هؤلاء الثلاثة، وحلفوا أنهم لن يبوحوا بسر هذا التآمر ما داموا على قيد الحياة، وكل واحد فيهم خد الورقة اللي اتفقوا عليها وحطها فى جيبه وما حطوهاش فى سجلاتهم!

طبعاً هذا التصرف لا يقدم عليه إلا من يخجل من تصرف، هذا التصرف هو تصرف من يعرف مقدماً أنه لا يرتب عملاً سياسياً وإنما هو يدبر جريمة.

إيه كان قصدهم من هذه الاتفاقية؟ إيه كان قصدهم من هذه المؤامرة؟ طبعاً كل واحد فيهم كان يسعى إلى تحقيق هدف خاص به من جراء التواطؤ على العدوان.

كانت بريطانيا تريد ضرب مصر لتعيدها إلى مناطق نفوذها، احنا كنا ضمن مناطق نفوذ بريطانيا لغاية الثورة وبعد الثورة صممنا على الجلاء، وخرجنا من مناطق النفوذ وتصدينا لحلف بغداد ووقفنا ضد حلف بغداد، وكانت

بريطانيا ترى بعد جلاء قواتها أنها لا بد أن تضرب مصر لتعود مصر مرة أخرى إلى مناطق النفوذ البريطانية، وكانت بريطانيا تريد الحيلولة دون قيام قوة ذاتية وطنية في مصر اقتصادية وسياسية وعسكرية؛ لأن احنا بعد الثورة بدأنا نبنى بلدنا، نبنى بلدنا سياسياً، إن احنا نعلن السياسة المستقلة التي تتبع من بلدنا، سياسة عدم الانحياز.. السياسة الحرة، وبدأنا سياسياً نكون فعلاً أحرار، ثم بدأنا اقتصادياً نبنى بلدنا ونعمل على تصنيعها، ثم بدأنا عسكرياً في إقامة الجيش الوطني القوي، يوم ما منعوا عننا الأسلحة عرفنا نجيب أسلحة ونكسر احتكار السلاح. كانت بريطانيا أيضاً تريد عزل مصر عن تأثيرها وتأثرها بالأمة العربية التي ينتمى إليها الشعب المصري، وتريد أن تقمع بالإرهاب احتمالات تفاعل التأثير والتأثر بما يخلق قوة كبرى في هذه المنطقة تتحدى سيطرة الاستعمار عليها اقتصادياً وسياسياً؛ هذا ما تريده أو ما كانت تريده بريطانيا بعدوانها علينا في سنة ٥٦.

فرنسا كانت تريد بالدرجة الأولى ضرب مصر باعتبار مصر قاعدة لحركة الثورة العربية، كانت فرنسا تريد أن تحول دون مصر وأداء دورها المشروع والحق في تأييد ثورة شعب الجزائر، كانت فرنسا تريد إخضاع القاهرة وكانت تعتقد أنها بذلك تستطيع إخضاع ثورة الجزائر.

وأنا في سنة ٥٦ قابلت "بينو" وزير خارجية فرنسا، وقال لي إن هو عايز يتكلم معايها عن اتفاق بالنسبة للجزائر، وأنا قلت له إن أنا لا أستطيع بأى حال من الأحوال إن أنا أتكلم معاك في موضوع الجزائر؛ لأن ثورة الجزائر لها قيادة، وهذه القيادة هي الوحيدة التي تستطيع أن تتكلم باسم ثورة الجزائر، ولكن احنا نساعد الجزائر معنوياً ونساعدهم بكل ما يمكن المساعدة، ولكن مش احنا اتلى بنحارب في ثورة الجزائر، اللي بيحارب في ثورة الجزائر هم الجزائريين.

واو عاكم تفكروا الكلام اللي بيقولوه الوزراء المقيمين في الجزائر إن هذه الثورة جاية من مصر، لا يمكن أن تقوم ثورة في بلد وتتدلج هذه الثورة من بلد آخر، لا بد أن تكون هناك أسباب ومقومات حتى تقوم الثورة.. والأسباب موجودة

فى الجزائر والمقومات موجودة فى الجزائر، قال لى: هل أنتم بتدربوا جزائريين؟ قلت له احنا كنا بتدرب جزائريين، ولكن انتهى هذا التدريب، والجزائريين قادرين على تدريب أنفسهم، أما نحن كعرب فحق علينا وواجب إن احنا نساعد ثورة الجزائر ونحن فى اعتقادنا أن ثورة الجزائر هى ثورة شعب عربى.. شعب مسلم؛ من أجل عروبتة ومن أجل حريةته.

هذا الكلام اللى أنا قلته لـ "مسيو بينو" وزير خارجية فرنسا، قلت له إن أنا أستطيع إن أنا أعمل لكم خدمة إن أنا اتصل بقيادة ثورة الجزائر وأطلب منهم إنهم يبعثوا ممثلين لهم فى القاهرة وأنتم تبعثوا ممثلين لكم فى القاهرة وتكلموا مع بعض.

وافق الخواجة "بينو" على هذا وسافر إلى باريس، وبعث اثنين من عنده، أحدهم هو سفير فرنسا فى الجزائر - على ما أعتقد سفير فرنسا فى الجزائر النهارده - وجُم ممثلين عن ثورة الجزائر، كل اللى طلبه "بينو" إن الموضوع يكون سرى ولا يعلن عنه شىء، واحنا وعدناه إن كل الموضوع حيكون سرى ولا يعلن عنه شىء.

وفى يوم من الأيام طلعت جريدة فى فرنسا ونشرت عن المفاوضات، فما كان من الحكومة الفرنسية إلا أنها فى الحال سحبت الاثنين ممثلينها من القاهرة بدون إبداء الأسباب؛ لأنها لم تستطع أن تواجه الجمعية الوطنية فى فرنسا. أنا باقول هذا الكلام للتاريخ، ولكن طبعا فرنسا أو السياسيين الفرنسيين فى هذا الوقت كانوا يحاولوا إنهم يلقوا اللوم عن ثورة الجزائر على أكتاف حد، فكانوا بيقولوا إن مصر وعبد الناصر هم المسئولين عن ثورة الجزائر، وكانوا بيقولوا أيضاً إن احنا ادِينَالَهُمْ وعود. وأنا شفت قريب مقالة لـ "مسيو بينو" بيقول فيها على هذه المقابلة إن هو طلب منى وعد - الصورة اللى هو بيديها للناس بتووعه - إن هو طلب وهو قاعد معايا بيقول أنا طلبت من البكباشى عبد الناصر إنه يدينى وعد إنه مش حيساعد الجزائريين، فراح قايم واقف وضارب رجليه فى بعض ومَعْظَم وقال لى إن أنا أعدك بشرف عسكرى إن أنا مش حيساعد الجزائر!

طبعاً وهم يقولوا هناك بقي إن عبد الناصر دا راجل عسكري وراجل ديكتاتور، وطبعاً علشان يتكلم لازم يقوم يقف ويروح خابط رجليه فى بعض وضارب سلام وقايل للخواجة "بينو" إنه مش حبيعت أى مساعدة!

دا طبعاً اللي حصل فى سنة ٥٦، ولكن كانوا الوزراء المقيمين من فرنسا فى الجزائر يقولوا إن احنا مالناش ذنب طالما فيه معونة من مصر، طبعاً احنا كنا بنساعد الجزائريين؛ كنا بنساعدهم معنوياً، وكنا بنساعدهم بالسلاح، وكنا بنساعدهم بكل شىء وكنا نعتقد أن هذه ضريبة علينا وواجب علينا بالنسبة لإخواننا فى الإسلام وإخواننا فى العروبة.

ولكن كان الساسة فى فرنسا فى هذا الوقت يتوهموا ويخدعوا أنفسهم إنهم إذا أخضعوا القاهرة يمكنهم أن يخضعوا ثورة الجزائر، وكان هذا ما تريده فرنسا بالعدوان على بورسعيد وعلى مصر فى سنة ١٩٥٦، وطبعاً لم يتحقق هنف فرنسا لا فى مصر ولا فى الجزائر.

بالنسبة لإسرائيل.. إسرائيل كانت مطالبها أكثر من كده، وكانت تريد هذه المطالب محددة. كلنا نذكر من سنة ٥٥ بعد صفقة الأسلحة الشيكية بدأت إسرائيل تتكلم عن الحرب الوقائية وعن خطر الجيش المصرى، وبدأت الصحف الغربية والصحف الاستعمارية والإذاعات الاستعمارية يقولوا إن دا سلاح شيوعى، وإن السلاح الشيوعى سلاح غير مؤمن، زى الملك فيصل ما يقول النهارده إن الحلف الإسلامى حلف مؤمن! وكان حلف بغداد حلف غير مؤمن.. يقولوا دا سلاح شيوعى.. سلاح غير مؤمن وقعدوا يحوروا فى الكلام.

طبعاً احنا هنا فى مصر ما انطلاش علينا هذا الكلام، كان أيامها ضدنا ١١ محطة إذاعة سرية، "صوت الحق"، "صوت الأحرار"، "صوت مصر الحرة"، وطبعاً فى العدوان كان فيه "صوت بريطانيا" وقبل العدوان كان فيه "لندن" و"الشرق الأدنى"، وكل هذه المحطات السرية كانت بتقول السلاح الشيوعى

والسلاح الشيوعي، وفي نفس الوقت إسرائيل كانت بتقول على الحرب الوقائية لمنع الجيش المصري من إنه يقوى ويكون عنده سلاح.

إذا كان هدف إسرائيل سنة ٥٦ ضرب الجيش المصري وتحطيم سلاحه، طبعاً باعتبار مصر أكبر بلد عربي وأقوى بلد عربي وبلد عنده إمكانيات الدولة، ومافيهش المشاكل الموجودة في أماكن أخرى، كانت إسرائيل تريد أن تجعل مصر جسد هامد لا روح فيه ولا مقاومة، وأيضاً كانت تريد أن تضرب دعوة القومية العربية اللي أعلنتها مصر بعد الثورة، واللى أعلنت فيها مصر إنها جزء من الوطن العربي، وكانت تريد تثبيت العزلة الجغرافية والعزلة بكل معانيها بين مصر وبقية المشرق العربي. كانت إسرائيل تشعر بالخطر بعد سنة ٥٢، وقيام الثورة المصرية والتعبئة الثورية المصرية التي كانت لها تأثير في مصر وفي خارج مصر. كان من أثر ثورة ٥٢ إن المركز الثوري المصري تدعم، بل المركز الثوري المصري أثر على الدائرة المحيطة به وتأثر أيضاً بالدائرة المحيطة به، وأصبح محور سير الحوادث في هذه المنطقة من العالم وفي المشرق العربي على وجه الخصوص، فكان هدف إسرائيل تحطيم المركز الثوري المصري.

دى كانت أهداف بريطانيا وأهداف فرنسا وأهداف إسرائيل. ومن نظرتنا لهذه الأمور نرى أنهم جميعاً - بريطانيا وفرنسا وإسرائيل - كانوا يريدون العالم العربي القديم، العالم العربي الذي سمحت لهم ظروفه وسمحت لهم الأنظمة الحاكمة فيه، والطبقات السائدة في مجتمعاته إنهم يحققوا كل ما حققوه من سيطرة طويلة لعشرات السنين.. سيطرة عسكرية.. سيطرة سياسية.. سيطرة احتكارية.. قواعد عسكرية للإرهاب وللإخضاع في كل مكان، ونهب للثروات بغير حساب.. نهب لكل الموارد.. إذلال بدون رادع لإرادة الكرامة العربية.. اقتطاع للأرض العربية بدون عقاب وإعطاء هذه الأرض لعناصر عنصرية غريبة عدوانية تخدم مخططاتهم.. إعطائها لإسرائيل. الكلام دا كان سائد في العالم العربي من الحرب العالمية الأولى والحرب العالمية الثانية لغاية ما قامت

انثورة في سنة ١٩٥٢ وصممت على أن تحارب الاستعمار، وتحارب مناطق النفوذ، وتحارب الأحلاف، وتحارب القواعد العسكرية، وتحارب الاحتكارات الأجنبية، وتعمل على رفع الكرامة العربية، ثم تعبئ نفسها وتعبئ الأمة العربية؛ من أجل تحرير فلسطين وعودة حقوق شعب فلسطين إلى شعب فلسطين.

في الحرب العالمية الأولى... وضحكوا على العرب وقالوا للعرب إنهم يتفقوا معاهم واتفق معاهم الملك حسين - جد الملك حسين اللي احنا عارفينه دلوقت - وقالوا له: إن احنا حنڏى الدول العربية استقلال، وفي نفس الوقت طبعاً الإنجليز اللي تحالفوا مع الملك حسين في الحرب العالمية الأولى علشان يحارب معاهم الأتراك راحوا اتفقوا في نفس الوقت مع اليهود من أجل إنشاء وطن قومي لليهود في فلسطين، وصدر بعد هذا وعد "بلفور". وانتهت الحرب و الملك حسين اللي كان متفق مع الإنجليز أهملوه وتركوه وقسموا المشرق اعربى بين الحلفاء المنتصرين، فرنسا خدت سوريا ولبنان، وإنجلترا خدت فلسطين والعراق، و الملك حسين اللي اتفق معاهم بعد كده مات ما لقولوش حاجة فجابوا ابنه وعملوا له إمارة شرق الأردن؛ جزء اقتطعوه من فلسطين وجزء اقتطعوه من سوريا، كانوا بالقلم الرصاص بيمسكوا خريطة الأمة العربية والعالم اعربى ويقسموا فيها زى ما هم عايزين، بعد كده عملوا قواعد وبعد كده استمروا يحكموا فعلاً العالم اعربى.

وبعد كده جابوا اليهود في فلسطين.. اليهود اللي كانوا في الحرب العالمية الأولى ما يطلعوش ٦% من فلسطين سمحوا بالهجرة وزاد عدد اليهود، مكنوا انيهود من إنهم يجيبوا سلاح، ومكنوا اليهود من إنهم ياخذوا الأراضي، ومكنوا انيهود من إنهم يعملوا جيوش سرية، ومكنوهم من فلسطين تحت اسم الأمة العربية كلها، طيب لكن كانت فين الأمة العربية؟! الأمة العربية كانت مغلوبة على نفسها، كانت العراق تحت حكم بريطانيا، وكانت فرنسا تحكم سوريا ولبنان، وكانت بريطانيا تحكم فلسطين وشرق الأردن وتحكم مصر وتحكم

السودان، وكانت إيطاليا تحكم ليبيا، وكانت فرنسا تحكم تونس والجزائر والمغرب.. دا العالم العربى فى الحرب العالمية الثانية لغاية سنة ٤٣ أو ٤٤.

أول ما تحرر، تحررت سوريا ثم تحررت لبنان، وطبعاً خرج الاستعمار وترك وراءه أعوان الاستعمار والمستفيدين من خدمة الاستعمار، وترك وراءه الاستغلال.. سيطرة الإقطاع وسيطرة رأس المال، واستمر الاستعمار فى البلاد العربية. فى سنة ٤٨ قررت بريطانيا إنها تسيب فلسطين بعد ما قرروا التقسيم ودخلت الدول العربية تحارب فى فلسطين، وهل فعلاً كانت الدول العربية سيدها نفسها؟ لم تكن الدول العربية فى هذا الوقت أو لم تكن الشعوب العربية سيدها نفسها، كان هناك من الحكام من هم عملاء للاستعمار، والاستعمار الللى حطهم، والاستعمار الللى حاميمهم، وأكبر مثل على هذا الملك عبدالله ماكانش ملك فى هذا الوقت، كان شيخ.. كان أمير شرق الأردن - ماكانش شيخ منصر لسه! - دا الللى حصل فى سنة ٤٨، كان شيخ ولكن فى سنة ٤٨ طبعاً اتفق مع الإنجليز وحسب الإنجليز ما قالوا، واتفق مع اليهود إنه ياخذ الجزء الباقى من فلسطين ويحولوا له المشيخة إلى مملكة وعلى حساب مأساة فلسطين وعلى حساب القتلى الللى سفناهم بعينينا فى سنة ٤٨.

اترقى الشيخ عبد الله إلى الملك عبد الله وبقي ملك وعنده عرش، حطوه على العرش فانحط وبقي عنده مملكة بيحكمها هو و"جلوب" شركة. ودا كان وضعنا فى سنة ٤٨، بعد ٥٢، بعدما طردنا احنا شيخ المنصر الللى كان عندنا وطردنا الملك فاروق، أصبح بعد هذا الوضع فعلاً الشعب فى مصر بيحكم نفسه بنفسه، معنى هذا إيه؟ إن الشعوب العربية الأخرى لابد أن تصمم على أن تحكم نفسها بنفسها، وتتخلص من الخيانات وتتخلص من الملوك الللى حطهم الاستعمار وتتخلص من الطبقات المستغلة.

طبعاً هل تقبل دول الاستعمار ودول الاستغلال هذا المنطق؟ لم تقبل دول الاستعمار ودول الاستغلال هذا المنطق، وكان قصدهم فى العدوان فى سنة ٥٦ إنهم يرجعوننا تانى ويجيبوا شيخ منصر يحطوه هنا فى مصر، ولو إن أنا طبعاً

متأكد مهما كانوا عملوا ومهما كانوا خلصوا حتى علينا جميعاً ماكانش  
حيسطيعوا إنهم يرغموا الشعب فى مصر؛ اللي داق فعلاً طعم الحرية، واللى  
بدأ كفاحه من أجل الاستقلال الحقيقى ومن أجل التقدم، إنه يقبل أن يعود التاريخ  
مرة أخرى.

وأنتم هنا فى بورسعيد اديتم مثل، أنا عارف إن ماكانش فيه قوات مسلحة  
كفاية فى بورسعيد فى يوم العدوان، القوات اللي كانت موجودة فى بورسعيد  
كانوا كتيبتين لسبب؛ لأن احنا بعدما هجمت إسرائيل أخذنا قوات من بورسعيد  
وبعتها على منطقة سينا وجبنا قوات من مصر وبعتها إلى منطقة سينا؛ على  
أساس إن العدوان عدوان إسرائيلى، وإن احنا لازم نوجه كل قوتنا لنضرب  
إسرائيل، ولم نكن نتصور أن بريطانيا بالذات تتواطأ مع إسرائيل؛ لأن تواطؤ  
بريطانيا مع إسرائيل معناه ضياع نفوذها كاملاً فى هذه المنطقة من العالم  
والقضاء على كل ما بنته بريطانيا فى هذه المنطقة.. فكان فيه كتيبة احتياط فى  
بورفؤاد، وكان فيه كتيبة احتياط موجودة هنا، والقوات العسكرية فعلاً فى هذا...  
أيام العدوان كانت أيام قليلة وفى ليلة العدوان بعنا.. بعنا عبدالحكيم قوات من  
مصر، قوات مدرعات ومدافع على أساس كان واضح إن منطقة العدوان حتكون  
بورسعيد.

وفى هذا اليوم وقف الشعب فعلاً، القوات المسلحة... أنا قلت فى الآخر  
والجماهير المسلحة.. الجماهير المسلحة وفتت تقاثل جنباً إلى جنب مع القوات  
المسلحة ووقفوا الأطفال، وأنا قرئت فى كتاب من الكتب إن فيه أطفال سن ١٠  
سنين وسن ١١ سنة كانوا ماسكين السلاح وكانوا بيحاربوا فى الشوارع وكانوا  
يقاوموا العدوان.

طبعاً أمّا تيجى بريطانيا الدولة العظمى وأما تيجى فرنسا الدولة العظمى  
عشان تهاجم بورسعيد المدينة الصغيرة ذات الشاطئ المحدود، وبتجيب كل  
قواتها من الدبابات والمدرعات، وأنا أيضاً قرئت فى يوم من الأيام إن حصل

ألف طلعة طيران وكل طلعة كانت ٣ طيارات، يعنى فى يوم حصل هجوم بما يقرب من ٣٠٠٠ طائرة على بورسعيد.

كل دا لم يؤثر على معنوياتها.. كل دا لم يؤثر على تصميمها.. كل دا لم يدفعها إلى اليأس، بل كل دا أثار ثورة من الغضب، وأثار ثورة من الكراهية ضد العدوان وضد الاحتلال وضد الاستعمار، وخرج شعب بورسعيد كله بنسائه، وأطفاله، ورجاله، وشبانه، وشيوخه يقاتلوا فى كل مكان، وكل واحد حمل السلاح.

معنى دا إيه؟ معناه إن الشعب اللي انتصر مرة، لن يقبل أبدًا، واللى داق حلاوة النصر لن يقبل أبدًا بأى طريقة من الطرق إنه يخضع، بل يكون أهون عليه إنه يموت وما يخضعش بأى شكل من الأشكال.

إذا الكلام اللي كانوا بيحلموا به إنهم ممكن يعيدوا الأيام الأولى مرة أخرى والنظم الأولى مرة أخرى بطريق مباشر أو غير مباشر؛ سواء كان فعلاً الثورة أو قادة الثورة - اللي هم الناس اللي قاموا بالثورة - موجودين أو غير موجودين، هذا كلام أوهام لأن الثورة لم تتمثل فى قادة الثورة فقط، ولكن هذه الثورة تمثلت فى الشعب كله بكل فرد من أبنائه.

إذا العودة بنا مرة أخرى إلى الماضى أمر يستحيل، لا بريطانيا ولا فرنسا ولا أكثر من بريطانيا ولا أكثر من فرنسا يقدروا يرجعونا مرة أخرى إلى ما كنا عليه، ولا يمكن بأى حال من الأحوال أن تتحقق هذه الأوهام.. هذه كانت أهداف بريطانيا وفرنسا وإسرائيل ولم يتحقق شىء من كل هذه الأهداف، اختلفت نتيجة العدوان عن كل ما قُصدَ الذين بيّتوا ورتبوا ودبروا واجتمعوا تحت الظلام واجتمعوا فى الحجرات المظلمة يدبرون الأسرار، حتى الأسرار اللي تلاتة بس حضروها وحلفوا على عدم البوح بها ماداموا على قيد الحياة، هذه الأسرار تكشفت خباياها السنة دى. وهذه الخبايا تدينهم جميعاً، وتجللهم بالخزى والعار، وتحكم عليهم أمام بلادهم وأمام الرأى العام العالمى.

بمناسبة مرور ١٠ سنين على العدوان والناس اللي قعدوا في أوضة في "سيفر" وحلفوا وتأمروا كل واحد قال إنه عايز يأخذ أسلاب؛ "بن جوربون" كان عايز يأخذ جزء من صحراء سيناء، وفعلاً أعلن إنه خد جزء من صحراء سيناء، وطبعاً بعد كده اضطر إنه ينسحب ويترك سيناء كلها، "أنتوني إيدن" كان عايز يجي تانى هنا في قصر الدوبارة زي ما هو كان زمان في قصر الدوبارة ويحكم، "جى موليه" عايز يجي يحتلنا تانى مع بريطانيا.

فين الجماعة دول النهارده؟ "أنتوني إيدن" فين؟ راح "أنتوني إيدن".. راح خالص وراحت أعصابه وذهب إلى ظلمات التاريخ، في إنجلترا السنة دي كلهم وهم بيكشفوا الأسرار، كانوا بيقلوا إن "أنتوني إيدن" حب يثبت إنه راجل فإنكشف - بيقلوا كده - هم اللي قالوا كده في إنجلترا، وأنا قريرت مذكرات "أنتوني إيدن"، وبعدما انكشفت كل هذه الحوادث بيطلع "أنتوني إيدن" - رئيس وزراء بريطانيا العظمى - كذاب، كاتب في مذكراته إن هو أبداً ماكانش متواطئ لا مع إسرائيل ولا مع فرنسا، ولكن أما إسرائيل هجمت على مصر هو خاف على الملاحه في قنال السويس وتدخل علشان يمنع القوات المتقاتلة المصرية والإسرائيلية عن قنال السويس، وعلى هذا الأساس حينما رفضت مصر قبول إنذاره بتسليمه بورسعيد والإسماعيلية والسويس والبعد عن القنال بـ ١٠ أميال تحركت قواته لاحتلال قنال السويس وحمايتها.

دا اللي كاتبه "أنتوني إيدن" لغاية النهارده في مذكراته الراجل - اذكروا محاسن موتاكم مش عايزين نتكلم عليه - وذهب إلى رحمة الله، ولكن قبل يعنى ما يموت بحقيقى علشان يثبت إنه راجل فعلاً مش كذاب وعنده شرف، بيطلع بيعترف إنه كان راجل مزور ويصحح مذكراته، وإلا الأجيال القادمة حتقول إن رئيس وزراء بريطانيا "أنتوني إيدن" كذب على التاريخ وكذب على مجلس انعموم، وكذب على الشعب البريطانى، وكذب على الرأى العام العالمى، وبعدما انكشف وانكشفت كذبه مآ رضىيش إنه يحافظ على شرفه ويصحح الكلام الكذب

اللى كتبه فى مذكراته، آدى "أنتونى إيدن" اللى كان عايز يتحكم فىنا، وعايز يحتلنا.

"جى موليه" راح فىن؟ أيضاً "جى موليه" النهارده هو بيكافح فى فرنسا ولكن انكشف أيضاً "جى موليه"، وانكشف تواطؤ "جى موليه"، الخواجة "بينو" بيؤلف قصص للأطفال النهارده حقيقى، وساب وزارة الخارجية.

"سلوين لويد" فىن؟ اللى هو وزير خارجية بريطانيا؟ شفت له فيلم أنا قريب كان اتعرض فى تليفزيون لندن وانفجرت عليه لقيته بيتهته فعلاً وقاعد بيبرر موقفه، ولكن كل اللى شفته قدامى واحد كداب قاعد فى التليفزيون يتهته، وآدى مصير "سلوين لويد".

"بن جوربون" فىن؟ خرج "بن جوربون" وقاعد بيكافح النهارده، فىن قادة العدوان؟! وفىن كل اللى شاركوا فى العدوان!؟

تطور الحوادث أزاحهم جميعاً عن المسرح كأنهم كومة أنقاض لم تبق منها فائدة ولم يبق منها رجاء، كلهم راحوا وفضل الشعب المصرى الباسل المقاتل الصامد، وبقيت الأمة العربية تكافح.. تناضل، وبقيت حوافز الحرية السياسية والحرية الاجتماعية والحرية الفكرية، تواصل نضالها وتواصل عملها، وتعيد بناء حياتها وتتقدم فى جميع المجالات.

### أيها الإخوة:

إن تقدم الأمم طريق مستمر من النضال، آمال الشعوب تكبر باستمرار، وهى لا تتحقق فى فراغ، كنا قبل سنوات، سنة ٥٣ و ٥٤ نطلب الجلاء.. كنا تناضل من أجل الجلاء.. كنا واحنا طلبة بنطلع فى المظاهرات كل أملنا إن احنا نشوف العلم البريطانى انزاح عن بلدنا، وإن احنا نشوف الإنجليز غاروا، كان أمل كل واحد فىنا، وكان البعض بيعتقد هذا مستحيل، وأنا يوم ما جيت عندكم هنا فى يوم ١٨ يونيو سنة ٥٦ ماكنتش مصدق.. ماكنتش مصدق إن الإنجليز مشيوا واحنا بنرفع العلم المصرى، طول عمرنا اتولدنا والإنجليز فى بلدنا وكنا

بنقول "يا عزيز يا عزيز داهية تأخذ الإنجليز" كنا صُغِيرِينَ، هل فعلاً جت داهية وخذت الإنجليز؟ ما جتس داهية أبداً خدت الإنجليز، وكبرنا والإنجليز فى بلدنا وشفناهم لغاية سنة ٤٦ فى قصر النيل ضربوا الناس والمظاهرات وموتوا الناس، واحنا كنا ضباط جيش وراحوا القنال وعملوا قاعدة كبيرة فى القنال، وطلبوا إن احنا ندخل حلف الدفاع عن الشرق الأوسط، وكان الجلاء هو مطلب كل واحد.

أما تحقق الجلاء، تحقق بالعرق وبالدم وبالجهد وبالفضال وبالکفاح والاستشهاد، ما استمرّيناش نفكر نقول إن هدنا هو الجلاء.. الجلاء كان هدف وخلص، ونسبنا إن كان فيه إنجليز فى مصر، ونسبنا إن كان فيه قشلاق قصر النيل، احنا طالعين نتمشى على كوبرى قصر النيل بعد الظهر نلاقى العساكر الإنجليز قاعدين فى الشبايك. ودلوقت طبعاً اللي فى مَحْنَا إن فيه الجامعة العربية وهيلتون والقشلاقات دى انتهت.

أنا باقول إن آمال الشعوب بتكبر باستمرار، بعد ما تم الجلاء أصبحنا نطلب الحرية، والحرية خطوة أبعد من الجلاء، ويوم ما استطعنا إن احنا فعلاً نحقق الحرية السياسية ونقضى على الاستغلال السياسى والدجل السياسى، والأحزاب اللى كانت متحالفة مع الاستعمار، نسبنا أيضاً الحرية السياسية وقلنا إن آمالنا بتكبر وابتدأنا نطلب الحرية الاجتماعية، والحرية الاجتماعية خطوة أبعد من الحرية السياسية، لم نكتف حتى بالقضاء على الإقطاع وتحديد الملكية، وتوزيع الأرض على الفلاحين، والقضاء على الإقطاعيين.. لم نكتف بهذا، آمالنا كانت دائماً تكبر وتتسع.

بعد الجلاء؛ حرية سياسية، والوحدة الوطنية هى سبيلنا إلى الحرية السياسية، وبالوحدة الوطنية تقدمنا إلى الحرية الاجتماعية وبدأنا فعلاً نخطط من أجل الحرية الاجتماعية، بعد ٢٣ ديسمبر بعد ما مشيوا الإنجليز بسبع أيام والفرنساويين من عندكم أمنا كل المصالح الإنجليزية والفرنسية فى مصر، ماأخذناش بس قنال السويس، أخذنا قنال السويس، وبنك "باركليز"، والبنك

العثماني، وشركة المنجنيز، والمناجم الإنجليزي، وكل المصالح البريطانية والفرنسية.

هل اكتفينا بهذا؟ لأ... جينا بعد كده أخذنا كل المصالح الأجنبية اللي موجودة في مصر.. أخذنا شركة شل، والأنجلو إيجبشين، وأويل فيلد وكل المصانع الأجنبية الموجودة.

أخذنا كل المصالح الأجنبية الموجودة في مصر.. أخذنا شركة شل، والأنجلو إيجبشين، وأويل فيلد، وكل المصانع الأجنبية الموجودة في مصر.. هل اكتفينا بكده؟ أبدأ.. آمالنا باستمرار بتزيد وآمالنا بتكبر، وأصبحنا نطلب التقدم على التقدم، ونفيس حياتنا بأرقى ما وصل الإنسان إليه من مستويات الحضارة.. ودى خطوة أبعد وأبعد، واحنا أما كنا بنطالب بالجلاء طلبنا الجلاء وقاتلنا فى سبيله، وحصلنا عليه من أجل ٢٠ مليون.

ودلوقت ونحن نطلب كل ما بعد الجلاء؛ نطلب الحرية السياسية، والحرية الاجتماعية، والتقدم، بنطلب لـ ٣٠ مليون؛ أى إن أفق مطالبنا يزيد، وحجم مطالبنا يكبر.

وطبعاً مافيش طلب ولا أمل بيتحقق فى فراغ.. لازم نناضل، ولازم نكافح، فى الحرب بنناضل بالسلاح.. بالدم.. بالأرواح، فى السلم بنناضل بالعرق وبالعمل.. بالذمة فى العمل، وبالأمانة فى العمل، (هتاف طويل للعمل، والرئيس يرد: احنا عايزين زيادة الإنتاج دى بجذ مش هتاف بس).

### أيها الإخوة:

لقد هزمتنا الأعداء فى معارك متعددة، كل الكلام اللي باقوله دا خطوات على طريق نصرنا النهائى فى حربنا الممتدة مع الأعداء. الحرب لم تنته بعد.. فيه معارك انتهت.. فيه مراحل عبّرناها.. ولكن المقاومة ضدنا مازالت مستمرة، قد تتغير الميادين، وقد تختلف المواقع؛ ولكنها نفس الحرب ونفس الأهداف.

سنة ٥٦ "دالاس" وزير خارجية أمريكا - الله يرحمه! - ماكانش بيعترض على أهداف العدوان، ولكن "دالاس" كان يعترض على أسلوب العدوان، كان 'دالاس' يريد تحقيق نفس الهدف بطريقة أخرى.. بوسيلة سلمية تقتل بغير انفجار.. طبعاً بعد العدوان فرض علينا الحصار الاقتصادي، وَجُمِدَتْ أموالنا في هذا الوقت في بريطانيا وفي فرنسا وفي أمريكا، وماكانش عندنا عملة صعبة، وأما حَبِينَا نشترى دَوَا من أمريكا وندفع قيمته من أرصدتنا المجمدة في أمريكا رفضت أمريكا ورفض "دالاس".. كان منطق "دالاس" في هذا الوقت هو القتل بالجوع بدلاً من القتل بالرصاص.

"ايدن" عايز يموتنا بالرصاص، و"دالاس" عايز يموتنا من الجوع.. القتل بالرصاص بيعمل دَوْشَة ويحدث ضجيج، ويلفت نظر العالم، ويثير موازين دقيقة في السياسة الدولية، أما القتل بالجوع فيحدث بهدوء وسكون، وَمَا لُوش دَوْشَة، ما فيش فرق بين العمليتين.. الهدف واحد طبعاً.. اللي كان بيحصل سنة ٥٦.. الظروف اتغيرت بعد ٥٦ مَا نَفَعِش تجميد أرصدتنا.. مَا نَفَعِش مبدأ "أيزنهاور"، مَا نَفَعِش كل الوسائل، ما نفعش الحصار الاقتصادي، وفي سنة ٥٩ قالوا الأمريكان: عفا الله عما سلف، وتعالوا نتفاهم، وما فيش داعي للعداوة. وعملوا اتفاقية معانا على أساس إنهم بيعتوا لنا القمح بالجنيه المصري، وابتدنا أظن أول سنة ادونا بما قيمته ٢٠ مليون جنيه، قلنا والله كتر خيركم، ودا يساعدا بدل ما كنا بنصرف ٢٠ مليون جنيه بنجيب بها قمح من بره؛ بنصرفها على التصنيع، وبنجيب القمح من أمريكا بالعملة المصرية؛ أي بناخد من أمريكا تقريباً معونة قيمتها ٢٠ مليون جنيه. وجينا بعد كده اتفقنا على السنة اللي بعدها إن احنا ناخذ قمح بـ ٤٠ مليون جنيه، قلنا والله دول ناس كَرَمًا، ووفرنا ٤٠ مليون جنيه كنا بنجيب بهم قمح؛ نتوسع بهم في الخدمات، ونعمل مدارس، ونعمل مستشفيات، ونعمل مصانع.

وبعدين جُمُ السنة اللي بعدها وقعدنا نتفاوض.. وافقوا إنهم يدونا بـ ٦٠ مليون جنيه، قلنا: عال قوى.. نتوسع في الصناعة، ونتوسع في الشغل، واحنا

فعلاً فى حاجة إلى إن احنا نُسرِّع بأقصى ما يمكننا علشان نَعَوِّض المجتمع المتخلف اللي احنا كنا فيه.

وجم السنة اللي قبل اللي فاتت كنا بناخد منهم بـ ٦٠ مليون جنيه قمح، والفلوس اللي كنا بنجيب بها قمح ابتدئنا نصرفها فى أبواب تانية، وتوسع فى مصانع، ونجيب مستلزمات إنتاج، ونجيب مطالب، ونجيب قطع غيار، ونجيب مصانع جديدة.. وجم السنة اللي قبل اللي فاتت بدأوا يطلبوا منا شروط بالنسبة للأبحاث الذرية، بالنسبة للصواريخ.. بالنسبة للجيش المصرى.. بالنسبة لسياستنا الخارجية إلى آخر النقاط المعروفة.

واحنا لم نقبل هذه الشروط.. ابتدأوا يقولوا لنا: لكن معنى دا إن احنا بنوفر لكم فلوس، وإن عن طريق الفلوس اللي بنوفرها لكم أنتم بتعملوا كذا وكذا، ودا بيخلى الرأى العام الأمريكى يكون مش موافق على سياسة الحكومة فى الاستمرار على هذه المعونات، والكونجرس الأمريكى مش موافق على هذه المعونات. قلنا لهم: والله احنا هذه الشروط كلها وهذه الطلبات لا نقبلها. وجم السنة اللي فاتت وابتدأوا يتعززوا، ويقولوا بنبحث الطلب، ووقفوا المعونة.. وقفوا الـ ٦٠ مليون جنيه أصبح علينا إن احنا نجيب.. نوفر بقى ٦٠ مليون جنيه، ونجيب بهم قمح، وإلا تصبحوا الصبح ما تلاقوش عيش فى الفرن، وكل واحد فيكم عايز يجيب الصبح ١٠ أرغفة واللا ١٢ رغيف، وأنا على أطعم كل يوم الصبح ٩٠ مليون رغيف؛ ٣×٣٠ يعنى على الأقل.. وقعدوا يقولوا لنا حنبت لكم قمح.. وقعدنا مستنين القمح.. لغاية ما وصلنا يوم وبقي القمح اللي عندنا فى البلد يكفينا شهر، وقلنا والله باين الجماعة دول عايزين يدونا مقلب كبير قوى، ويخلونا نقوم ما نلاقيش عندنا لا قمح ولا دقيق، ويعملوا لنا مجاعة فى البلد، وابتدينا طلعلنا نشترى.. كل ما نروح دولة ونتفاهم معاها إنها تباع لنا قمح ترجع تانى وتقول: والله أنا عندى مشاكل وبتاع، مش حاقد أبيع لكم، فضلنا لغاية ما بقى عندنا يمكن احتياطى القمح ١٥ يوم، وما احناش عارفين نشترى قمح..

السنة اللي فاتت.. والحقيقة بقينا فى وضع سيء جداً.. قدامنا ١٥ يوم يا نجيب قسح يا يتكون عندنا كارثة كبيرة جداً.

الحل كان إيه؟

بعت جواب لرئيس وزراء الاتحاد السوفيتى.. وبالتلغراف طبعاً.. العملية مش عايزه لا طيارة... وقلت له آدى وضعنا النهارده.. عندنا قسح ١٥ يوم، وإذا ماجالناش قسح قبل الـ ١٥ يوم تكون عندنا مشاكل كبيرة، وأنا عارف انكم عندكم عجز فى محصول القمح، ويتشتروا قسح من كندا ومن استراليا، ولكن للظرف اللي احنا فيه أنا باطلب انكم تبيعوا لنا فى الحال ٣٠٠ ألف طن من القمح، وحن دفع تمنهم. تانى يوم جا لى منه جواب بالتلغراف إنهم وافقوا على إمدادنا بـ ٣٠٠ ألف طن من القمح، وإنهم ادوا تعليمات للمراكب اللي جاية لهم من استراليا ومن كندا إنها تتحول على إسكندرية؛ علشان توصل لنا فى الحال الـ ٣٠٠ ألف طن، طبعاً شكرتهم، ولكن دا مثال من حرب التجويع اللي احنا بنقابلهها النهارده.

حرب التجويع لا تختلف أبداً عن حرب الرصاص.. الهدف واحد.. الهدف إن احنا نخضع، طبعاً ما كانش عندنا مانع أبداً انهم يقولوا لنا إن احنا مش حنديكم، بس يقولوا لنا من بدرى علشان ندبر أمرنا، ونقول لهم والله كتر خيركم واحنا بندبر أمرنا، ولكن وضعونا السنة اللي فاتت فى موضع صعب، وجُرم الآخر قالوا: والله ممكن نعمل اتفاق، واحنا اتأخرنا، وعملوا معنا اتفاق على حوالى ٢٠ مليون جنيه؛ جزء كبير منه بالعملة الصعبة؛ ندفعه بالدولارات على عدد من السنين. السنة دى ما بناخدش معونة أمريكية.. هم بيقولوا إن الموضوع عندهم على المكتب، بيبحثوا فيه، فعلينا إن احنا نوفر الـ ٦٠ مليون جنيهه علشان نجيب بهم القمح.

احنا بنستورد ٢ مليون طن قسح غير الدرة، وبننتج مليون ونص طن قسح، طبعاً احنا فعلاً غلطنا الحقيقة فى حساباتنا قبل كده؛ إن احنا توسعنا فى

الصناعة، وتوسعنا فى عمليات نصرف عليها عملة صعبة؛ على أساس إن الـ ٦٠ مليون اللى حناخدھم من أمريكا دى عملية مستمرة كل سنة.

جينا السنة اللى فاتت لقينا نفسنا ما خدناش الـ ٦٠ مليون.. أخذنا ٢٠.. إذا كان علينا إن احنا نوفر ٤٠ مليون.. الحقيقة علشان نوفر ٤٠ مليون مش سهل؛ خصوصا إن احنا فى توسعنا عايزين نشغل أكبر عدد من الناس، وننتج أكبر كمية من الإنتاج، ولم نقصر فى هذه الميادين.. كنا بنصرف كل ما فى إيدنا، بل بالعكس كنا بناخد قروض علشان التوسع فى التصنيع.. وطبعاً التوسع فى التصنيع يستدعى التوسع فى المواد الخام، والتوسع فى استيراد مستلزمات الإنتاج، والتوسع فى استيراد قطع الغيار، والتوسع فى استيراد مواد الاستهلاك؛ لأن الاستهلاك نتيجة لهذا.. نتيجة المرتبات اللى بيأخذوها الناس الجُداد اللى بيشتغلوا فى كل سنة عايزين استهلاك أكثر، على هذا الأساس ما حسَبناش إن احنا حنيجى يوم حتقف المعونة الأمريكية، وعايزين نوفر الـ ٦٠ مليون.

طبعاً السنة دى عايزين نوفر أيضاً الـ ٦٠ مليون.. بنضطر نوفرها مسن أبواب مختلفة، لغاية ما نوازن نفسنا ونزيد إنتاجنا، ويكون توفير الـ ٦٠ مليون مش حيؤثر علينا. معنى دا إيه؟ معناه إن احنا توسعنا فعلاً أكثر من قدرتنا بـ ٦٠ مليون جنيه اللى كانوا بيدوهم لنا الأمريكان، أو بيدونا بيهم قمع بالجنيه المصرى، اتقطع النهارده الـ ٦٠ مليون جنيه، واحنا لازلنا متوسعين أكثر من قدرتنا، لازم نوفر الـ ٦٠ مليون جنيه دول علشان نجيب بهم الـ ٢ مليون طن قمح كل سنة. وعلشان نوفر الـ ٦٠ مليون جنيه دول لازم نصدر.. ما هو قدامنا حاجة من اثنين: يا نوقف مصانع لأن احنا مش قادرين نستورد لها مستلزمات إنتاج ومواد خام، يا نصدر أكثر من قدرتنا بـ ٦٠ مليون جنيه؛ من اللى كنا بنصدره السنة اللى فاتت والسنة اللى قبلها. طبعاً كوننا ننط مرة واحدة ونصدر بـ ٦٠ مليون جنيه أكثر عملية صعبة؛ إذا حنزيد تصديرنا ونحاول نوفر بعض الحاجات، وفى هذا المجال قد تقابلنا بعض الأزمات.

مثلاً احنا كنا بنستورد التلو اللي بنعمل منه الصابون من أمريكا، وجزء أيضاً من المعونة اللي كنا بناخذها من أمريكا كنا بنجيب منه تلو الصابون، بعدما اتقطعت المعونة السنة اللي فاتت أصبح علينا إن احنا نستورد هذه المواد من بلاد أخرى، استيرادنا من هذه المواد ما بين ٧ و ١٠ مليون جنيه، وطبعاً لتأخير في الاستيراد عمل خلل في التوزيع والاستهلاك، ومشينا بأزمة اللي سميها أزمة الصابون. الناس يمكن تضايقت من هذا، ولكن احنا يمكن نقابل مشاكل بهذا الشكل في السنة دي والسنة الجاية، وأنا باشرح لكم الليلة إيه السبب مثلاً في أزمة بهذا الشكل. علينا نوفر فلوس، وعلينا عبء ٦٠ مليون جنيه زيادة.. لازم هذا العبء نوفره؛ لأن القمح مادة ضرورية قباذى أفضلية للقمح، ولكن احنا بعد كده قدرنا.. تأخرنا.. حصل فرق في الوقت بين حاجة وحاجة، وجبنا بعد كده التلو واشتغلت مصانع الصابون، واتعمل الصابون بالبطاقة، ويعدين حثيبله من البطاقة، ويرجع الحال كما كان، ولكن مشكلة بهذا الشكل ماتخوفناش.

قصدى من هذا الكلام كله الحقيقة إن كل واحد فينا بيكون واعى، ويعرف إيه المشاكل اللي موجودة.

واحد بيقول: الله، واحد كتب في الجرايد من الصحفيين ويقول الصابون.. دا الصابون دا احنا بنعمله في مصر.. ازاي بتحصل أزمة؟ لأ.. هو الصابون فعلاً احنا بنعمله في مصر، لكن المادة الخام بتاعة الصابون بنستوردها، وجت لنا أزمة نتيجة الظرف اللي احنا مرينا فيه، السنة اللي فاتت والسنة دي، وبنعتقد إن احنا السنة الجاية - إن شاء الله - نستطيع إن احنا نوازن موقفنا، ونوفر، ونزيد إنتاجنا في الزراعة، وفي الصناعة، وفي التصدير، ونعتمد على أنفسنا كل الاعتماد. واحنا النهارده ما بناخدش معونة، وبنقول لنفسنا إن احنا بدون معونة نستطيع أن نعمل، ونستطيع أن ننتج، ونستطيع أن نصدر، وعلى قَد الإنتاج وعلى قَد زيادة الإنتاج ممكن تكون فيه زيادة في الاستهلاك. ولن يستطيع أى إنسان، أو أى رئيس، أو أى دولة، أو أى ملك، أو أى صُعلوك في العالم كله إنه

يضعط علينا اقتصادياً، ويخلينا نقبل شرط من الشروط؛ ما احناش مستعدين نقبل ولا شرط من الشروط ولو اختفى الصابون؛ صابون الغسيل، وصابون التواليت، وكل أنواع الصابون، وممكن نقعد سنة من غير صابون، وقعدنا من السنة اللي فاتت ٣ أيام فى الأسبوع من غير لحمه، وغليت أسعار اللحمة؛ لأن احنا أيضاً قابلنا ضغط السنة اللي فاتت، لكن رجعت السنة دي رخصت أسعار اللحمة لوحدنا، وزاد إنتاج اللحمة، وزاد إنتاج الفراخ - مؤسسة الدواجن ومؤسسة التربية الحيوانية - نتيجة الإنتاج اللي احنا عملناه نستطيع إن احنا نتغلب على كل أزمة من الأزمات، ولكننا بهذا نستطيع أن نحقق آمالنا؛ نستطيع بتصميمنا وصبرنا، ووعينا وعملنا، وجهدنا وإنتاجنا، نستطيع إن احنا فعلاً نبني المجتمع اللي احنا عايزينه، ونبني الصناعة اللي احنا عايزينها، ونزود الإنتاج اللي احنا عايزينه، وعندنا عملية أساسية لن نستطيع أى دولة، ولن نستطيع أمريكا إنها تفرض شروطها علينا، وأيام قبول الشروط انتهت.. احنا دولة واعية، ونستطيع أن نعتد على أنفسنا كل الاعتماد، وبالععمل والعمل الجدى وزيادة الإنتاج وحصر التكاليف اللي ما لهاش داعى ومنع الإسراف؛ نستطيع إن احنا نكون عندنا الكفاية الذاتية، ونعتد على أنفسنا كل الاعتماد.

أنا باقول هذا الكلام ليه؟ باقول إن حرب الجوع اللي عملوها علينا سنة ٥٦، والضغط الاقتصادى اللي عملوه علينا سنة ٥٦، واحنا ما كناش بناخد معونة سنة ٥٦ ولا ٥٧ ولا ٥٨ لغاية ٥٩، واللى ما نفعش فى هذه السنين بيبتكر بعض الناس إنها ممكن تتفجع النهارده؛ بعد ما أخذنا معونة وقطعت عنا هذه المعونة.

احنا بنقول.. لا حرب جوع حتنفع معانا، ولا حرب مسلحة حتنفع معانا، ولا تهديد حينفع معانا. احنا ناس دقنا طعم الحرية، واحنا ناس دقنا طعم النضال والكفاح، وحنناضل ونكافح فى سبيل بناء بلدنا؛ زى ما ناضلنا وكافحنا فى سبيل حماية بلدنا ضد العدوان فى سنة ١٩٥٦.

أنا باقول هذا الكلام؛ لأن الأيام بتعيد نفسها.. المعارك مستمرة لم تنته، معارك الجوع مستمرة.. معارك الضغط مستمرة.. معارك الحصار الاقتصادي مستمرة.. معارك الدعاية الكاذبة.. كان علينا ١١ محطة إذاعة سرية ومحطات إذاعة، النهارده موجود محطات الإذاعة الكاذبة مستمرة، طبعاً عملية تمزيق الأمة العربية مازالت تحدث، مازالت الطبقات الحاكمة المستفيدة من التواطؤ مع الاستعمار.. الطبقات التي مكّنت الاستعمار من السيطرة.. الطبقات التي مكنت من قيام إسرائيل؛ مازالت هذه الطبقات موجودة في العالم العربي تؤدي دورها.

فيه صف سقط من هذه الطبقات.. من هؤلاء الناس، ولكن القوى المعادية لأمة العربية سارعت إلى وضع صف آخر.. سقط عرش فيصل الأول في العراق، وقام عرش فيصل الأول في السعودية يؤدي نفس الدور العميل، اختفى نوري السعيد وعبد الإله وغيرهم، ودفع الاستعمار بدلاً منهم بأخرين يقومون بنفس المهمة.. طبعاً الجُداد يمكن أقل شهرة من السابقين، وأقل منهم مقدرة؛ ولكن يعززهم استفادة الاستعمار من دروس هزائمه السابقة.

وبرغم تأكيد التاريخ عملاً وفعلاً بأن ذلك كله لا يجدي، إلا أن المحاولات مستمرة، وحتى إذا ما قَدُرُوش يرغموا حركة الثورة القومية على التراجع.. يمكن يستطيعوا أن يقوموا بمهمة تعويق.. تعطيل، تُؤخّر تقدمها على الأقل.

قاموا بهجوم حلف بغداد سنة ٥٥، سقط حلف بغداد في بغداد نفسها، تارفين القصة كلها. قاموا بهجوم ضد الوحدة بين مصر وسوريا، وأقاموا نظاماً للانفصال في دمشق، سقط حكم الانفصال في دمشق نفسها. قاموا بهجوم ضد ثورة اليمن، واتفقت بريطانيا مع السعودية على ضرب ثورة اليمن، والرجعية العربية وعملاء الاستعمار على ضرب ثورة اليمن.

وايه الوضع النهارده في اليمن؟ ماقيش حرب النهارده في اليمن.. بقي لنا تقريباً سنة ونص بيقولوا أخبار، كل يوم بتذيع محطة لندن ومحطة إسرائيل،

ويمكن راديو عدن وراديو الملك فيصل، والجرائد العميلة في المنطقة؛ يقولوا فيه معارك، وبعض جرايد بريطانيا.

أنا باقول لهم المعارك دى كلها فى خيالكم.. مافيش معارك.. الجيش المصرى بقى له سنة ونص ما دخلش معارك فى اليمن. اليمنيين أنفسهم أخذوا المسئولية فى أكثر المناطق، واليمنيين اللى قاموا بالثورة، واللى ضربوا حكم الإمامة، واللى قضاوا على حكم القرون الوسطى هم اللى وأخذين المسئولية.

أمال إيه اللى بيحصل النهارده؟ أوشكت الثورة أن تندلع فى عواصم الذين دبروا المؤامرات ضد ثورة اليمن.. والملك فيصل أدرى باللى بيحصل فى بلده.. هو عارف وأنا عارف إيه اللى بيحصل هناك.. هم حبوا يكفوا على الخبر ماجور ولا يقولوش.. ولا من شاف ولا من درى.. هم.. وأما نشرنا احنا هنا أخبار اللى حصل فى السعودية ما اتكلموش، لكن الأمريكان تكلموا، طلعا الأمريكان، وطلع المتحدث الرسمى، قال الانفجار اللى حصل دا ماكانش مقصود به البعثة العسكرية؛ إذا يعنى حصلت انفجارات.. إذن فيه كفاح من اتحاد شعب الجزيرة العربية، الثوار فى كل مكان ضد الاستعمار، وضد أعوان الاستعمار، مش ممكن كل الناس يبقوا عبيد أذلاء، مش ممكن كل الناس ترضيه المادّة. ممكن يشتري بعض الناس، لكن مش ممكن يشتري كل الناس، فيه ناس عندها أمل فى الحرية، والعدالة الاجتماعية والحرية الاجتماعية والحرية السياسية والديمقراطية.. احنا ما بنعملش ثورات فى أى بلد.. مألناش تنظيمات حزبية فى أى بلد، ولكننا نساند المناضلين والثوار فى كل بلد؛ لأنهم على حق.. مع التاريخ.. ضد التخلف.

ثورة اليمن استقرت النهارده، بيقولوا فيها مشاكل، وأنا باقول لهم المشاكل اللى أنتم بتقولوها دى على الورق بس، فى جرايدكم وفى إذاعاتكم، والثورة ماشية. قواتنا المسلحة قاعدة هناك بتحمى الثورة.. اللى حيتدخل حنقطع رقبتّه، وعاهدنا نفسنا على أن نساند الثوار فى كل مكان، والأحرار فى كل مكان.

النهارده احنا فى السنة الخامسة، ونفسنا مش حيتعب؛ بنقعد الخامسة والسادسة والسابعة، قللنا مصاريفنا فى اليمن، ورتبنا أمورنا هناك، وإذا حَدَّ اعتدى على اليمن قواتنا عندها تعليمات أن تضرب قواعد العدوان.

الثورة استقرت فى اليمن، أما الذين دبروا المؤامرات ضد اليمن وضد الثورة اليمنية ملهيين النهارده فى حالهم، وبيدوروا على حماية أنفسهم.

حكم الاستعمار فى الجنوب المحتل.. فى الجنوب العربى.. تهاوى حكم الاستعمار فى الجنوب العربى؛ إذا التاريخ معنا والنضال مستمر.

بعد كده أمّا نستعرض حلف بغداد.. استعرضنا حلف بغداد، واستعرضنا الانفصال، واستعرضنا ثورة اليمن، ثم نستعرض الـ ٣ سنين اللي فاتت.. استغلوا الدعوة إلى مؤتمرات القمة، وإلى بحث إمكانيات العمل العربى الموحد.. تنكروا إن أنا من هنا.. من بورسعيد فى سنة ٦٣ طلبت مؤتمر قمة لوحدة العمل العربى من أجل فلسطين، وقلت لكم إيه الأسباب اللي دفعتنى إلى هذا، ودخلنا فى هذا الموضوع بقلب صاف، ونية خالصة، وليس لنا من هدف إلا مصلحة الأمة العربية، وقلنا إن احنا قد نستطيع بهذا أن نعطي فرصة قد تستثير نخوة هؤلاء الناس، وكرامتهم، ووطنيتهم، ويخلصوا، من أجل وحدة العمل العربى من أجل فلسطين.

نذكر أيامها كان إيه الحال.. الحال أيامها كانت القوات المسلحة فى هذه النول تُعَبَّر عن تضامنها مع الثورة، ودا كان المعنى من مجيء الطيارين السعوديين الأحرار، ومجىء الطيارين الأردنيين الأحرار إلى القاهرة، ورغم هذا قلنا عفا الله عما سلف، نعمل مؤتمرات القمة.. قعدوا ٣ سنين على القمة، واستغلوا الـ ٣ سنين.. استعَبَطُونَا؛ الملك فيصل انتهز الفرصة، وقال إنها فرصة بيتفق مع الأمريكان ويخبط العرش فى السعودية ويشيل أخوه، والملك حسين قال فرصة يثبت نفسه وبعدين أهو يخبط له قرشين من مؤتمرات القمة،

ويرجع يخطب له قرشين تانى بعد كده بمناورة من مناوراته من الملك فيصل، ويستغل كل واحد مؤتمرات القمة لأهدافه.

وجُمُ السنة اللي فاتت حصل إيه؟ بدأت الدعوة المشبوهة إلى الحلف الإسلامى.. الملك فيصل حس إن الدنيا هادية وماحدش بيهاجمه، وماحدش بيكشفه؛ الرجل اللي غدر بأخوه ممكن طبعاً يغدر بصاحبه، وقال نغدر بهؤلاء الناس، ونطلع ناخذ بعض بالأحضان وبالقُبُل، وكل واحد ماسك سكينه فى يده.

قعدنا نفكر.. قلنا الناس دول ليه بيعملوا كده؟ العملية عملية النظم الاجتماعية؛ هنا فيه عدالة اجتماعية وهناك فيه سلب اجتماعى وسفك اجتماعى، الملك فيصل سافف البلد كلها، وإذا انتقلت دعوة العدالة الاجتماعية مش حيقدر يستعبد البلد.. هو بيحكمها لوحده ومعاه شويه أمراء، وبيقولوا إنهم بيحكموها حسب الدستور، وإن احنا ما نعملش دستور لأن القرآن دستورنا، بيضحكوا على عقول مين؟ هم الناس بقوا مغفلين لدرجة ان الكلام دا ينطلى عليهم؟

طبعاً الناس مش مُغفلين.. الناس فاهمين إن دا دجل وخداع، وضحك على الدقون، ودقون بتضحك على دقون.

طيب احنا حيضحكوا علينا؟ ما احنا مالناش دقون! بدأت الدعوة المشبوهة للحلف الإسلامى، وبدأ الملك فيصل يتحرك، وبعدين.. هل فيصل يصدق واللا أنا أصدق إنه اتحرك لوحده؟ أسياده هم اللي بيحركوه، أسياده هم اللي بيحركوه.. القوى اللي عايزة هذه المنطقة داخل مناطق النفوذ... أمريكا وبريطانيا عايزين هذه المنطقة داخل مناطق النفوذ.. كانوا عايزين حلف البحر الأبيض المتوسط ولا قدرُوش.. كانوا عايزين حلف بغداد وسقط حلف بغداد.. كانوا عايزين مبدأ "أيزنهاور" وسقط مبدأ "أيزنهاور"، النهارده بيقولوا عايزين المؤتمر الإسلامى أو الحلف الإسلامى، وبدأت الدعوة المشبوهة.

الخواجة بورقيبه جه هنا وكرمناه، واحتفلنا به، وقلنا عسى.. لعل وعسى الرجل يؤمن بالعروبة فعلاً، وطلع من عندنا هنا وانسحب من لسانه.. وطلع

يطلب الصلح مع إسرائيل، ويقوم بدوره الانهزامى الانقشامى، هل انسحب من لسانه وحده واللا حد سَحَبَ لِسَانَهُ؟ مش معقول.. بورقييه واحد سحبه من لسانه؛ وهو على هذا الأساس حب يبيع العرب والعروبة بأى مبلغ.. حب يستفيد من اليهود، من الأمريكان، ومن الألمان.. أهو عايز يستفيد وبَسْ.

طيب.. وعروبة تونس؟ هو بيقول لك أنا تونس وشعب تونس.. هو بيقول إنه هو الحاكم بأمره، وأى كلام بيقوله يمشى عليه.

حُكَّام الأردن برضه جم السنة اللي فاتت.. الملك حسين لعب بديله.. ليه؟ ييجى ويقول احنا كويسين، واتقابلنا فى الدار البيضاء وبتاع، قابلت رئيس الوزراء بتاعه وصَفَى التل، ليه يا أخينا لعبتم بديلكم؟ قال أبداً دا احنا حيينا نخبط قرشين من الملك فيصل.

الله! بقى تضحك علينا احنا الاتنين! طيب ضحكت على الملك فيصل، حتضحك علىّ أنا كمان؟!

وعاد حكام الأردن سيرتهم الأولى.. أساليب الغدر والخيانة والعمالة للاستعمار، احنا مشينا معاهم سنة واثنتين وثلاثة، وقلنا أيضاً لعل وعسى إن ربنا يكون تاب عليهم.. طلع ما تَابَشِ عليهم.

العميل يفضل طول عمره عميل، الغدار يفضل طول عمره غدار، والخائن يفضل طول عمره خائن، والرجل اللى باع نفسه مرة باستمرار مستعد إنه يبيع نفسه.

اتحركوا فى الأردن ضدنا واتحركوا فى السعودية ضدنا، وضد العرب كلهم.. واتحرك الخواجة بورقييه ضدنا، وضد العرب كلهم، وكان من ورائهم الاستعمار، وتصوروا إن فى وسعهم أن يحققوا هذه المرة ما عجز غيرهم عنه فى مرات سابقة، هل نجحوا؟ ٣ سنين على القمة قاعدين مستريحين وما عندهمش مشاكل، احنا أعلنّا فى يوليو تأجيل مؤتمرات القمة.. ليه أعلنّا تأجيل مؤتمرات القمة؟ هؤلاء الناس بيخونوا وبيشتغلوا لحساب الاستعمار، ويتمسحوا

فى مؤتمرات القمة، وبيجوا يُقعدوا معنا فى مؤتمرات القمة، وكل واحد يكلموه، اللى بيقول الحلف الإسلامى يقول دى مؤتمرات القمة هى اللى قررت الدعوة إلى التضامن الإسلامى والمؤتمر الإسلامى؛ وهو كذاب. الثانى يقول دى مؤتمرات القمة والقيادة العربية الموحدة.. الله! طيب إذا كان العامل الأساسى لمؤتمرات القمة إن يكون فيه تعايش وفيه صفاء؛ ثم انقلب علينا هؤلاء الناس وغدروا بنا، كيف تستمر مؤتمرات القمة؟ كيف نأمن لهم؟ كيف نأمن ليفصل أو نأمن لحسين أو نأمن لبورقيبه؟ إذا كانوا دول مشبوا فى طريق الاستعمار، وساروا فى مخططات الاستعمار؛ إذا من حقنا ومن حق الأمة العربية علينا أن نواجهها بالحقيقة، ونقول إن العملية لا يمكن أن نخدرها بمؤتمرات القمة، ولكن الأوضاع تحتاج إلى كفاح وإلى نضال مستمر؛ حتى تستطيع الأمة العربية أن تحقق أهدافها، وحتى تستطيع الأمة العربية أن تحقق وحدة عمل من أجل فلسطين، وبدلاً من مؤتمرات القمة التى أصبحت مؤتمرات زائفة ومؤتمرات خادعة؛ يجب أن تلتقى قوى الثورة العربية، ووحدة الثوار العرب، ووحدة المناضلين العرب؛ لأن وحدة الثورة ووحدة النضال هى التى تجمع الناس على أن يسيروا فى أى طريق، وكل واحد منهم آمن من الآخر، وآمن إن الآخر يحميه، أما السير مع عملاء الاستعمار والرجعيين فمعناه إنهم زى ما عملوا فى ٤٨؛ زى ما عمل الملك عبد الله فى ٤٨ يعمل الملك حسين فى أى معركة قادمة، ويعمل الملك فيصل، ويعمل الحبيب بورقيبه؛ لأنهم كلهم ساروا فى طريق الملك عبد الله، زى ما عمل الأمير عبد الإله، وزى ما عمل نورى السعيد فى ٤٨.

إذا دخولنا أى معركة مع هؤلاء الناس، حَيِّدَعُونَا، وهم مستعدين يبيعوا الأمة العربية؛ زى ما باعها الملك عبد الله فى سنة ٤٨، وزى ما باع فلسطين نورى السعيد، والأمير عبد الإله فى سنة ٤٨، فيصل النهارده مستعد يبيع فلسطين، مستعد يبيع الأمة العربية، مستعد يجيب بعثة أمريكية وبعثة إنجليزية،

ومستعد يعمل أى شىء علشان يضرب الثورة فى اليمن، ويضرب الثورة فى مصر، ويضرب الثورة فى أى بلد عربى.

فيصل يعتقد أن الثورة العربية خطر عليه أكثر من خطر إسرائيل، فيصل يعتبر إنه مطمئن من إسرائيل؛ ولكن المبادئ اللي بتنادى بها الثورة العربية هى خطر عليه؛ لأنها مبادئ تنادى بالعدالة الاجتماعية، وفيصل يحكم فى بلده بالظلم الاجتماعى، بالقبلية.. حكم عائلى.. حكم مستبد، طبعاً ازاي نمشى معاه فى أى ضيق من طرق التحرير؟!

أيضاً هذا ينطبق على الملك حسين، والملك حسين باع نفسه خالص للاستعمار، وسار فى طريق الاستعمار، ولا يمكن أن نطمئن إليه؛ لأن احنا فى سنوات مؤتمرات القمة حاولنا بكل وسيلة من الوسائل أن نتفق، وأن نمنع عنا أى شبهة من الشبهات، ولكن رغم هذا كان هناك الغدر، وكان هناك التآمر.. التآمر بين الدول الاستعمارية، وبين حسين وفيصل؛ علشان يعملوا محور مع الاستعمار ضد الثورة العربية، وضد الأمة العربية.

٣ سنين على القمة والدنيا كانت هادية، وكانوا مسترَجِحِينَ جداً، ثم انتهت مؤتمرات القمة، ٤ أشهر بعد انتهاء مؤتمرات القمة.. إيه اللى حصل؟

الشعب العربى فى الأردن استطاع من خلال غضبته ضد الظروف على الخطوط الأمامية أن يعلن رأيه فى نفس الوقت ضد الحكم المتواطئ.. الحكم العميل فى عمان.. هذا الحكم الذى أتاحت له الفرصة بعد الفرصة، لتعديل أوضاعه، ولكنه لم يستطع أن يتغلب على طبيعته.

الشباب التونسى - شباب الجامعات - أعلن رأيه بوضوح ضد الحكم الأحمق الذى يفرضه بورقيبه ضد تونس.

الشعب العربى فى الجزيرة العربية السعودية يتحرك فى كل مكان، والأنباء ترد عن نضاله وعن تَمَلُّمِهِ.. كل هذه إشارات تنبئ أن الرجعية مهما تحالفت مع الاستعمار، ومهما تلونت وغيرت جلدها كالحرباء.. مهما فعلت ومهما

طعنت من الخلف ومن الظلام؛ تمشى فى اتجاه معاكس لاتجاه التاريخ؛ لأنها تمشى فى اتجاه معاد للتقدم، الذى هو جوهر حركة التاريخ، والهزيمة - أيها الإخوة - دائماً لأعداء التاريخ وأعداء التقدم، والنصر دائماً للسائرين مع تيار التاريخ.. مع تيار التقدم.

### أيها الإخوة:

هذه كلها معارك يتحقق فيها النصر لشعبنا ولشعوب الأمة العربية، ولكن النصر النهائى فى حرب المصير كلها يتحقق ويتأكد بالقوة الذاتية الشاملة فى جميع الاتجاهات، وهذا هو التحدى الحقيقى الذى يواجهنا اليوم؛ تحدى إن احنا نعمل، العامل لازم يعمل ودلع مافيش، والإدارة لازم تعمل ودلع مافيش، إذا كنا عايزين نبنى بلدنا لازم المجتهد يأخذ نصيبه والكسلان والمتهاون يأخذ جزاؤه؛ علشان بنبنى بلدنا، دا التحدى الحقيقى اللى بيواجهنا اليوم.

عايزين نبنى صناعتنا ونبنى الصناعة الثقيلة؛ علشان نستغنى عن حاجات كثير بنستوردها من الخارج، بنستورد مستلزمات إنتاج، وبنستورد مواد لو نبنى صناعاتنا الثقيلة... وبنستورد قطع علشان نجمعها، لو نبنى صناعاتنا الثقيلة نستغنى عن الحاجات دى.

التحدى الحقيقى اللى قدامنا النهارده إن احنا تكون عندنا كفاية ذاتية فى الأكل، نطور الزراعة بالأسلوب العلمى ونزيد الإنتاج.. التحدى الحقيقى اللى قدامنا النهارده أن نحقق ديمقراطية الخدمات، ما نقعدش نشتكى من المستشفيات ومن الخدمات الموجودة فى كل مكان، لازم نعمل ديمقراطية الخدمات اللى اتكلمنا عليها قبل كده، ونعمل ديمقراطية بالنسبة للمجالس الشعبية علشان تكون فيه رقابة فى المحافظات.. التحدى اللى قدامنا أن نوؤمن تحررنا الثقافى والفكرى، وأن نطلق ملكاتنا وقوى إنتاجنا؛ لنبنى ونخلق ونبدع.. دا الكلام اللى احنا علينا نعمله النهارده.

التحدى اللى موجود قدامنا النهارده أن نصنع المجتمع القادر على مواجهة الضغوط، القادر على الاعتماد على النفس.. مَا قَدَامُنَاش طريقة النهارده إلا أن نعتمد على أنفسنا.

فى سنة ٥٢ كنا بنصرف على الجيش ٤٠ مليون جنيه، النهارده بنصرف على الجيش ٢٠٠ مليون جنيه.

فى سنة ٥٢ كنا بنصرف على التعليم ٢٠ مليون جنيه، النهارده بنصرف على التعليم ١١٠ مليون جنيه.

فى سنة ٥٢ كانت ميزانيتنا ٢٠٠ مليون جنيه، النهارده ميزانيتنا ١١٠٠ مليون جنيه، وبرضه مطالبنا ما انتهتس.. أنا مش خَالْبَى لكم مطالبكم من جيبى، ولا من أملاكى.. أنا لا عندى أملاك ولا عندى حاجة فى جيبى، باديكم مطالبكم من عملكم.. عايزين بيوت تشتغلوا وتتجوا؛ علشان نقدر نديكم بيوت ونبنى لكم بيوت.. عايزين قمح لازم تطور الزراعة ونشتغل فى الزراعة ونصلح الأراضى؛ علشان نجيب قمح ونجيب أكل.. إلى آخر هذه المواضع. عايزين شغل، أنا باقول احنا - لغاية دلوقت - بنشغل الناس كلها، كل سنة بيطلع ٢٥٠٠٠ - ٣٠٠٠٠ من الجامعة بنشغلهم، من المعاهد العليا بنشغلهم، من المدارس الثانوية بنشغلهم، العمال بيشتغلوا، كنا ٣,٥ مليون عامل، النهارده بقينا ٧,٥ مليون عامل.

حققنا كثير، طيب.. طيب بعد كده حنعمل إيه؟ بتخلفوا كل سنة مليون، حنعمل إيه فى المليون؟ عايزين أكل لمليون.. احسبوا المليون دول عايزين.. عايزين لبن، عايزين أكل، وبعدين عايزين شغل.. نجيب لهم شغل منين؟ إذا لازم نشغل بضواقرنا وإسناننا ونحفر الأرض؛ وإلا أولادنا حيكونوا عاطلين.

هو دا السبيل.. طيب أنا حاشغل الناس فين؟ هو أنا عندى حاجة بتاعتى باشغل الناس فيها؟ ما أنا باعمل مصنع باحط فيه ٢٠٠ أو ٣٠٠ أو ١,٠٠٠، طيب إذا جيت بقى وما عملتش مصانع يبقى ولادكم مش حيشتغلوا.. ما هى

العملية ١ و ١ = ٢، أنتم بتقولوا عايزين.. عايزين ناسكم وأولادكم يشتغلوا، واخوتكم يشتغلوا، طيب حنعمل مصانع ازاي؟ وحنصلح أرض ازاي إلا إذا أنتجنا، ما هي بالفلوس اللي بنتجها، والفلوس اللي احنا بنوفرها، طيب هو احنا بنجيب فلوس منين؟ أما نعمل خطة بـ ٣٢٠٠ مليون جنيه، حاجيب الـ ٣٢٠٠ مليون جنيه منين؟ ما أنا حاجيئهم منكم أنتم، دفعتم الـ ٣٢٠٠ مليون جنيه حانفذ الخطة، إذا ما دفعتموش مش حننفذ الخطة، حاخدهم منكم برضاكم أو غصب عنكم.. ليه؟ مش علشانى، ما أنتم بتقولوا لى أولادنا لازم تشغلهم؛ حاضر، واخوتكم أشغلهم.. كل واحد عايز عرسان لبناته، كل واحد عايز يجوز أولاده، ما هو دا المجتمع، ما هي دى الدنيا اللي احنا عايشين فيها.

وأنا باشوف الشباب في الشارع، كل واحد عايز يفرش بيت، كل واحد عايز سكن، وكل واحد... حنعمل دا منين؟ عايزين ننفذ الخطة يبقى فيه ٣٢٠٠ مليون جنيه بننفذ بهم الخطة.

الخطة الخمسية اللي فاتت كانت ١٥٠٠ مليون جنيه، أخذنا منكم ألف مليون جنيه، واستلفنا من الخارج ٥٠٠ مليون جنيه، الخطة الجديدة ما نقدرش نستلف فيها زى الخطة القديمة، ليه؟ لأن اللي استلفناه فى الخطة اللي فاتت بندفعه دلوقت، وأما نستلف تانى النهارده سلفيات كبيرة حندفعها بعد كده، وحيبقى علينا عبء كبير، ويندفع فوايد ٦% و ٧% و ٨%، إذا الـ ٣٢٠٠ مليون جنيه لازم نوفرهم، نقدر نستلف ٢٠٠ مليون جنيه أو ٣٠٠ مليون جنيه، ولكن ٢٩٠٠ مليون جنيه لازم نوفرهم. فى الخطة اللي فاتت كان الادخار أقل من ١٠%، ما ينفعش، احنا عايزين فى الخطة اللي فاتت ١٥% ادخار؛ علشان نجيب الـ ١٥٠٠ مليون جنيه أو الـ ١٠٠٠ مليون جنيه.

الخطة الجاية ٣٠٠٠، ضعف الخطة اللي فاتت بنقول عايزين ٢٠%، احنا لغاية دلوقت ١٠% يمكن أو أقل حتى. عايزين ادخار ٢٠%، الادخار هو إيه؟ ما هو صناديق التوفير، المعاشات، التأمينات الاجتماعية إلى آخر شهادات الاستثمار أو الضرايب، مافيش غير كده.

فلازم يكون فيه ادخار اختياري أو ادخار إجباري؛ علشان نبني مجتمعنا، ونصنع المجتمع القادر بتاعنا، والناس تاكل وتلبس وتشتغل؛ يبقى لازم الخطة دي تدوني ٣٢٠٠ مليون جنيه. تدوهم لى ازاي؟ وبعدين لازم أيضاً أصدر؛ لازم أصدر للخارج، علشان نصدر للخارج لازم نوفر، علشان اشترى من الخارج لازم أدفع، وعلشان أدفع يبقى لازم أصدر.

احنا كنا عايزين نصدر رز، وزاد استهلاك الرز، يبقى الحل الوحيد إيه؟ ما هو قدامنا حاجتين: يا نعلي سعر الرز، يا ما نبنيش مصانع ونعمل عاطلين. الطريقة الصعبة وما قدمناش غيرها، المعادلة الصعبة قلنا نعلي سعر الرز، بنضطر نصدر رز نص مليون طن بدل ما كنا مش حنقدر نصدر حاجة، بيقل الاستهلاك، بالنص مليون طن اللي حنصدرهم حاعمل لكم ١٠ مصانع؛ أو حاجات علشان الناس تشتغل فيها. وإذا ما صدرناش الناس اللي حيشغلوا فى المصانع دي مش حيشغلوا، حيبقوا عاطلين.

ما قُدمناش غير الوسيلة دي، أنا باقول لكم هذا الكلام، المسئولية مش مسئوليتي أنا، اللي بيطلب لازم يعمل، ولازم ينتج، ولازم يزيد الإنتاج، العمال اللي أخذوا جميع الامتيازات الموجودة فى العالم، جميع التأمينات الموجودة فى انعام عندهم؛ حتى تأمين البطالة، يبقى العامل اللي يزوغ من العمل لازم يتبرفد؛ لأنه رجل غير أمين على بلده، ولا يستحق بأى حال من الأحوال إنه ياخذ شرف العمل، ونجيب واحد أحق منه.

أيضاً الإدارة الغير أمينة لازم تتحى، وعلى هذا الأساس نمشى، ونمشى مجتمع جَدُّ مَافِيهَشِ دلع؛ علشان نبني بلدنا، وعلشان أولادكم يتعلموا.

احنا عايزين سنة ٧٠ يكون عندنا محلات لجميع الأولاد فى كل المدارس، لغاية النهارده احنا أولادنا اللي بلغوا سن الإلزام مَالْهَمُشِ محلات فى المدارس كلها، فيه ولاد مَالْهَمُشِ محلات، خططنا سنة ٧٠، احنا النهارده عندنا فى

الإعدادى حوالى ٤,٥ مليون طالب، ٤,٥ مليون فى الابتدائى، لكن لازلنا عايزين محلات أكثر، خطتنا سنة ٧٠ بيكون عندنا محل لكل طالب.

فى ظروفنا دى إذا ما زودناش الإنتاج، وإذا ما صدرناش وزودنا الإنتاج الزراعى وزودنا الإنتاج الصناعى لن نستطيع فى سنة ٧٠ إن احنا نحقق هذا الهدف اللى هو هدف عزيز، لكن إذا عملنا وإذا أنتجنا وإذا صدرنا نستطيع إن احنا نحقق المجتمع اللى احنا عايزينه، المجتمع اللى فيه عمل لكل واحد، والمجتمع اللى فيه خدمات لكل واحد؛ مجتمع الخدمات، ثم المجتمع اللى حاسس بجهده وحاسس بعمله وبنضاله وكفاحه، والقادر على مواجهة الضغوط، ما حدش يقدر يقول لنا نجوعكم واللا نقطع معونة، ما احنا ما بناخدش، والمجتمع القادر أن يعتمد على النفس، احنا واجهنا ضغوط وسوف نواجه الضغوط.

### أبها الإخوة:

معيار الإخلاص الثورى والالتزام الاشتراكى فى هذه المرحلة هو القدرة على خدمة الإنتاج، وبالتالى التمكين من تحقيق الأهداف التى يريد بلوغها؛ سواء بالنسبة للاستهلاك المحلى المتزايد أو بالنسبة للتصدير.. أيضاً الحاجة إلى تحكم دقيق فى مواردنا المحدودة، عندنا موارد محدودة، عندنا ٦ مليون فدان كانوا موجودين من أيام محمد على من أيام ما كنا ٥ مليون، وكانوا موجودين سنة ٥٢ أيام ما كنا ٢٠ مليون، والنهارده بقينا ٣٠ مليون، زودنا - احنا - حوالى ٧٠٠ ألف فدان فى وقت الثورة، نصهم استزرع ونصهم لسه ما استزرعش، عملنا السد العالى لسه ما خدناش نتيجة السد العالى، لسه نقدر نصلح مليون فدان، فى المليون فدان احنا بنكلف الفدان ٣٠٠ جنيه، عايزين ٣٠٠ مليون جنيه علشان نصلح مليون فدان فى الصحارى، عايزين جزء منهم بالعملة الصعبة، علشان نشترى الآلات.

إذا مواردنا المحدودة لازم نتحكم فيها، واحنا بنحفر فعلاً بضوافرنا فى الرمل وفى الصحراء وبنصلح، وعندنا شعب عامل وقادر إنه يصلح؛ لكن المهم ان احنا نستمر فى عملنا، عايزين كفاءة للإدارة وسلطة للإدارة، عايزين قيادات فى مواقع الإنتاج مخصصة، عايزين عمال كل واحد ملتزم ويعرف واجبه، عايزين قيادات سياسية وعمل فى الاتحاد الاشتراكي من أجل الإنتاج، إذا ما أنتجناش مافيش فائدة فى الفلسفة اللي بيقلوها دي كلها، لا نقابات العمال ولا الاتحاد الاشتراكي ولا أى حد. أول بند من بنود الفلسفة هو الإنتاج، وإذا أنتجنا بعد كده ننفلس زى ما احنا عاوزين ننفلس.

### أيها الإخوة:

دا التزامنا وواجب علينا أن نقوم به، نحن نناضل فى بلادنا من أجل البناء، ونحن نناضل فى العالم العربى لتحقيق وحدة القوى الثورية الشعبية العربية، دا هو الأمل الحقيقى والوحيد بالنسبة للأمال العربية البعيدة، نحن نعزز كفاح كل شعب عربى ونسانده عن إيمان بوحدة النضال وبوحدة المصير.

### أيها الإخوة:

نحن نؤيد سوريا فى نزاعها على أنابيب البترول، ونحن نعتقد أن هذه القضية قضية عادلة، وأنا سمعت من وزير خارجية سوريا، نائب رئيس الوزراء ووزير خارجية سوريا، بيقولى إن احنا مش عايزين نغير الاتفاقية اللي موجودة - واللى اتعملت سنة ١٩٥٥ - احنا عايزين أن تطبق هذه الاتفاقية تطبيق عادل، احنا شفنا الحسابات، الأرباح بيننا وبين الشركة مناصفة، ولكن الشركة بتدى ١٦ مليون ليرة سورية إكراميات - بقشيش لناس - ازاي احنا نأخذ ونتكفل بنص الـ ١٦ مليون؟! إذا كانت الشركة عايزه تدى إكراميات تدى من نفسها، دا طلب عادل، وفضلاً عن اعتقادنا بسلامة موقف سوريا وعدالة

مطالبها فإن هذه الأناييب، أناييب البترول، هي نفسها الأناييب التي نسفها عمال سوريا والشعب السوري البطل وقت العدوان الثلاثي علينا.

### أيها الإخوة:

نحن نؤيد العراق ونقف مع قيادته الوطنية، في تأكيد ودعم وحدته؛ أساس استقراره وضمأن رفاهيته.

### أيها الإخوة:

نحن نؤيد كل بلد عربي ثائر.. نحن نؤيد الجزائر في نضالها من أجل الثورة ومن أجل الاشتراكية.. نحن نؤيد اليمن في نضالها ضد الاستعمار وضد أعوان الاستعمار.. ونحن نؤمن أن القوة الذاتية لكل بلد عربي تصنع القوة الشاملة للأمة العربية على أساس من التنسيق ومن التكامل، كما أن التفاعلات الثورية تمنح جماهير الشعوب العربية فرصة أن تدفع إلى الأمام وإلى مواقع القيادة بأحسن عناصرها؛ لتخوض الساعات الفاصلة في صراع المصير لتصفية بقايا الوجود والنفوذ والتحكم الاستعماري، ولبناء القوة الذاتية العربية لتصفية العدوان الإسرائيلي على فلسطين، والتهديد الإسرائيلي لكل أمال العرب في الأمن وفي الوحدة. ولن نستطيع أن نستعيد حقوق شعب فلسطين إلا ببناء قواتنا الذاتية العربية في كل بلد عربي، وإلا بتلاحم القوى الثورية العربية، وفلسطين هي جرح دام في قلب الأمة العربية؛ ولهذا نحن نؤيد التلاحم الثوري وبناء القوى الذاتية الثورية العربية.

ليست - أيها الإخوة - هذه هي قضايانا وحدها، ولكن هناك قضايا السلام في العالم، وقضايا المواجهة، وقضايا العدوان، والغارات الأمريكية التي يتعرض لها كل يوم شعب فينتام والقنلى الأبرياء، ليست كل هذه قضايا بعيدة عنا هي في صميم كفاحنا، نحن في عالم - أيها الإخوة - لا يستطيع أن يعيش أحد فيه بمفرده وفي عزلة عن غيره؛ قوى العدوان - أيها الإخوة - تتقاسم فيما بينها الأدوار والغنائم، وقوى السلام لابد أن تتضامن فيما بينها؛ لكي لا تتحول واحدة

بعد واحدة فرادى وعزلاء؛ لتصبح بعض غنائم قوى العدوان.. لا بد من تضامن قوى الثورة العربية حتى نستطيع أن نواجه الاستعمار والرجعية فى الأمة العربية، ولا بد من تلاحم قوى السلام فى العالم حتى نستطيع أن نواجه قوى العدوان فى العالم، ولا بد أن نعمل ونبنى ونناضل ونكافح فى بلدنا؛ حتى نستطيع أن نقف ونصمد للضغوط.. وحتى نستطيع أن نعتمد على أنفسنا، والله يوفقكم.

والسلام عليكم ورحمة الله.